

RE KA EA HO MANG?

 Moena Ruddell. Ak'u mpolelle...Che. E, ke rialo. O e buile. [Moena o re, "O na a batla a fositse."—Mong.] Ka baka leo, kea bona. Ka holimo ka *mona*. ["Uh-huh."] Empa ha se ka *mona* hantle.

² Be, ruri re thabetse ho etela Moena Ruddell le kereke ea hae hape mona, bosiung bona. 'Me ba na le lifene, ha le ena le motlakase, ka baka leo le ka iketla la ba hae. Ke ile ka lula koloing ho fihlela e le nako ho kena, kahobane ke tsebile ho tla chesa. Eka, Indiana, re na le mariha e ntoo ba lehlabula, re ntoo khutlela ho mariha hape.

³ 'Me ka baka leo ke thabile ho menahane, bosiung bona, ho ema sefaleng sena le Moena Ruddell, hobane Moena Ruddell eka e mong oa bashanyana ba ka. Ke sa hopola, lilemo tse fetileng, 'na le ntat'ae re sa sebetsa 'moho. 'Me eitse ha moshanyana enoa a tla, 'me o ithutile, a ea Sekolong sa Modimo sa Bibele, ho batla ho mo thatafalla ho qala. A bonahala a sa batle ho tsoa, le hona. O batla a le lekhonono, a le lihlong. Empa, qetellong, a peselesa, 'me tsena ke litholoana tsa ho peselesa ha hae. 'Me le 'na, kea khlooa, Moena Ruddell o sa qala. Ena esale qalo feela. 'Me ho thata ho bolela hore e tla hola hakae. Eka e ka khurumetsa meru e lefifi holimo mona. Joale ka...

⁴ Ke ne ke bolella motho e mong, ka ntle, Moena Mike Egan. Lilemo tse 'maloa tse fetileng, ke ne ke tsoma lihlora hantle hona mona. Kamoo lintho li nkang taolo. Eka tsoelopele e qeta sebaka sohle. Ha re sa tla fumana sebaka sa ho tsoma lihlora kapa ho tsoma mebutla, ho hang, ha sebaka sena se ka tsoelapele ho hola tikolohong ena. Joalo feela ka...

⁵ Lilemo tse 'maloa tse fetileng, holimo mona tulong ea khale eo ke holetseng ho eona, khele, u no u lokela ho tsamaea maele ho ea ha moahelane. Joale, u ke ke ua hafatsa metsi ka monyako o ka morao, u sa a hafele monyako oa hae. Ka baka leo, batho bohole ba hatellane 'moho.

⁶ Ho hotle ho tla etela koano. 'Me nke ke ka le ts'oarella nako e telele. Moena Ruddell o nkopile, nakoana e fetileng, ho nyolohela koano tabernakeleng, ho rapella bakuli.

⁷ Ke nahana, ntho e le 'ngoe e thusang moreri e mocha joale ka enoa, ha re tla 'me re rapella bakuli, haholo-holo ha feela Morena oa rona a ka re bonts'a karoloana ea Khanya ea Hae, hoo ho tla natlafatsa kereke e ncha ena. Ke bona metsoalle e meng ea ka mona e tsoang tabernakeleng, le literaseti tse 'maloa, le ba joalo. 'Me joale, bana, bongata ba batho bana ba

bone Morena a folisa bakuli. 'Me, be, ha feela A ka e etsa hape bosiung bona, ho hata temeng, ka Khanya ea Hae, hoo ho tla—hoo ho tla natlafatsa tumelo ea batho. Ho tla ba fa e—ets'epo.

⁸ Hoo ho tla thusa Moena Ruddell, hobane Moena Ruddell o ikemiselitse ho bolela Evangelie Tletseng. Joale, a ka nts'oabisa hampe ha a sa etse joalo. Kea kholoa Morena o tla e etsa. Ka baka leo, homme, hape, o tla tsepama le Eona hantle. 'Me mohlomong likopano tse nyenyane tsena li tla khona, ka mokhoa ona, ha bang ba rona bareri ba holileng, lea tseba, re ka kena, khele, hoo ho thusa bashanyana bao.

⁹ 'Me joale, ho bomphato ba tabernakele, ke tla theoha hosasane, ke mpa feela... Joale, nke ke ka fumana nako ea khefutso ho fihlela la lesosome le metso e mehlano Phato. Ke kopano ka morao ho kopano e 'ngoe. Ka hona mohlomong, nka etela sekolo sa Sontaha, empa e se ho bua.

¹⁰ 'Me ke masoabi ho utloa, nako e fetileng ea hora, hore Moena Neville, molisa oa rona, soare sa hae sa mosali se patiloe kajeno. Kea ipotsa na tabernakele e tsebile taba eo. Ha ke kholoe Moena Neville a le teng mona. Ke shebile hohle, pele ke bua taba ena. Kea ipotsa na ba tsebile ho ka romela lipalesa mono. Ke mpa ke sa tsebe. Ke sa tsoa e utloa, metsotso e 'maloa e fetileng. Billy o mpoleletse motho a 'moleletse hobane soare sa Moena Neville se patiloe kajeno. Ruri ke masoabi ho utloa hoo. E ne e le leloko la ka le hole, ka lenyalo. 'Me ke masoabi haholo ho utloa hoo, ho tsamaea ha hae.

¹¹ Metsoalle e 'meli ea ka e robetse mono le eona, bosiung bona: Dave Wright le Mongh. Henson. Ke ne ke sa tseba ba ntse ba kula. Ba shoetse kokelong bobeli, maobane le hoseng hona, kea kholoa.

¹² Ka baka leo, ho supa ntho e le 'ngoe, ha rea lula nako e telele mona. Re ntse re tsamaea re theoha ka tsela. Ha re tsebe mohla Molimo a tla hula palo ea rona rakeng ea likarete. Re tla lokela ho arabela.

¹³ Ka hona ha re kena ts'ebeletsong ena, bosiung bona, kea tseba ho a chesa, ho hobe haholo. Empa re ke re hopole hoba re tla koano ho sebetsa ka matla a bokhoni ba rona, ho bonts'a Molimo ha re ts'epeha re bile re Mo rata. 'Me re batla ha motho ka mong mona, ea sa Mo rateng, ho Mo rata bosiung bona. Bohle ba sa lumeleng ho Eena, re batla le lumele ho Eena, bosiung bona, ka pelo eohle ea lona. Kopano ena e tle e fetoh mokolokotoane oa histori, holimo mona tabernakeleng ena, le tle khone ho supa morao nakong ena, le re, "Bosiung boo, Morena o ile a re etela a etsa hore-le-hore."

¹⁴ Ka baka leo, joale, pele re phetla Bibebe palong ea Lentsoe...

¹⁵ Le nkutloa hantle morao mono, ka mots'eo koana? Kea ipotsa, ka *mona*, ha eba le... Le utloa hantle? Ho lokile, ka *mono*? Ha kea bona lihloho tse ngata tse omang. Ho joang tjee, ho molemo ho feta? [Phutheho e re, "Amen."—Mong.] Ho lokile. E ts'oare *tjena*, he.

¹⁶ Joale ha re inamiseng lihloho tsa rona motsotso ho rapela. 'Me kea ipotsa, ka mahlonoko a motsotso ona, ho na le ba ratang ho hopoloa thapelong mona, ka ho phahamisa matsoho a lona? Molimo a hlohonolofatse, e mong le e mong oa lona. O a bona 'me o a tseba.

¹⁷ Ramehauhelo oa rona ea Maholimong, re kena ka pel'a Sefahleho sa Hao ka ts'abo, e se ka lihloho tse inameng feela, empa lipelo tsa rona li iname. Hobane re eleloa ho ngoliloe Lentsoeng la Hao, ho re, "Moo ba babeli kapa ba bararo ba kopaneng, Ke tla ema har'a bona." Ka baka leo re kholisehile hoba U teng mona joale, hore Moea o moholo o Halalelang o tsamaea har'a mohaho o monyenyanne ona, kahobane e le ts'episo ea Molimo.

¹⁸ Re U rapela ho hlohonolofatsa 'moka oa rona bosiung bona. Hlohonolofatsa kerekana le molisa oa eona, le basebetsi-mmoho ba eona bohole, litho tsohle. 'Me e hole e be e hole ho fihlela e fetoha ntlo ea leseli ea 'Muso oa 'Molimo, ho fihlela batho ba tsoa hole le haufi, ho eta, ho bona mosebetsi oa Morena. E ke e ts'oane le tempele ea khale, hoo batho bileng ba tsoa lefats'eng lohle ho utloa bohlale ba Salomone, le hore ho etsoe lintho tse ngata tse kholo. 'Me hohle moo re kopaneng ka Lebitso la Hae, ke sets'a sa ho kopana seo, tempele ea Morena.

¹⁹ 'Me re U kopa ho hlohonolofatsa, bosiung bona, bahlanka ba Hao, le lithapelo tseo re U hlahisetang tsona, lithoko tseo re li binang. 'Me hlohonolofatsa Lentsoe, Morena. Le sa tsoa, Le ke le oeple mobung o motle ruri. Hantle horeng ena, Morena, re U rapela ho fothola moutloa o mong le o mong o motala, motso o mong le o mong oa bokhopo, le ho se lumele hohle, lipelong tsa batho; Lentsoe le tle le oeple mobung o motle, o nonneng, o nonts'itsoeng, Le tle le hlahisetse batho bana litholoana tse kholo.

²⁰ Hlohonolofatsa bohole ba phahamisitseng matsoho a bona. U a bona 'me U tseba lithoko tsa bona. Re abele sena, Ntate, ka Lebitso la Mora oa Hao ya Halalelang, Morena Jesu, re a e kopa. Amen.

²¹ Joale, bosiung bona, lona ba ts'orereng Libibele tsa lona, ke rata le phetle le 'na ho Mohalaleli Johanne, khaolo ea 6, 'me a re qaleng ka temana ea 66, 'me re bale litlhaku tse 'maloa. Mohalaleli Johanne 6:66.

Ha e sa le mohlang oo barutuoaa ba bangata ba hae ba khutlela morao, ba se ke ba hlola ba tsamaea le eena.

Eaba Jesu o re ho ba leshome le metso e 'meli, Na le lona le rata ho ikela na?

. . . Simone Petrose o mo arabela a re, Morena, re ka ea ho mang? hoba ke uena ea nang le mantsoe a bophelo bo sa feleng.

*'Me re lumetse ra ba ra tseba hobane ke uena Kreste,
Mora oa Molimo o phelang.*

²² Ha nka e bitsa sehloho, ke ratile ho se rala tjena: *Re Ka Ea Ho Mang?*

²³ Le a tseba, batho kajeno ba ts'oana le batho ba tsatsi leo haholo. Batho ba tsamaea hohle, ba sa tsebe moo ba eang, eka ha ba tsotelle. Ba kene tokolohong ho ea moo ba ratang teng, 'me—'me eka batho ba tsomang menate. U batla a ts'oana le mohla a na a ngala Molimo ts'imong ea Edene, 'me a tloheloa ho ikhoantrella ka bo-eena. Ha a kenyé Molimo mererong, 'me u ea hohle moo a ratang teng, 'me u batla a hlanyetsa menyaka.

²⁴ 'Me—'me ha a eso ho fetohé hakaalo menahanong ea hae. Ha eso ho fetohé hakaalo mehopolong ea hae. O sa ntse a batla borapeli ba hae ba lehlaku la feiga, le a tseba. O batla, ho its'ebeletsa bona, a ikapese, 'me a tlohe a tsamaea eka, bonnyane, nka rialo, bonnyane, a khotsofetse, khotsofalo ea maiketsetso, ha eba e utloahala e etsa kelello. Khotsofalo e tsoang tumelong ea maiketsetso. Athé, tlase moeeng oa hae, o tseba a le phoso. O a tseba hobane ntho ka 'ngoe eo motho a lokelang ho e etsa, e silafetse le ho qaleng. 'Me ha a khone ho ipholosa joale ka ha a ka sitoa ho tlolela khoeling ka matla a hae. A ke ke a khona. Ha a leka ho etsa hoo, o ts'oana le lengau le lekang ho nyeka le hlakola matheba a lona. O mpa a khants'a libe tsa hae le ho feta. Empa eena, leha ho le joalo, ha a batle ho utloa. O lelera hohle feela.

²⁵ Empa, Petrose, mohlang oo, a ka araba joalo ka boholo ba rona bosiung bona. O ne a fumane ntho e fapaneng. O ne a kopane le Jesu, 'me a tseba ho ena le ntho e fetang ho lelera feela. Motho mang le mang ea kopanang le Jesu, ha a sa batla ho lelera hape, le ka mohla. Ho na le ntho e mo hlahelang ha a kopana le Jesu. Ha a sa ts'oana le pele. 'Me Petrose enoa o na a kopane le Jesu, 'me ho Jesu a fumane ntho e fapanang le ea mang kapa mang. Ha ho eso be le monna ea ts'oanang le Jesu. 'Me ho Eena a fumane ntho e kholo ena, e entseng hore A arabele potso ena, "Morena, re ne re ka ea ho mang?"

²⁶ Jesu a re, "Joale, ha—ha le batla ho tsamaea le bao ba mashome a supileng, le lokolohile, le ka ea la ikela."

²⁷ Empa Petrose a re, "Re ne re ka ea kae? Re ne re tla ea ho mang? Hoba ke Uena feela ea nang le Lentsoe la Bophelo bo sa Feleng." Ho se motho ea nang le Bona ha e se Eena. 'Me Petrose o na a tsamaile le Eena nako e lekaneng, a bile a bone mehlolo le liponts'o, le meeka e tsoang ho Molimo, 'me a tseba hoba hoo e ne e le 'Nete, hore O ne a ena le Lentsoe la Bophelo bo sa Feleng.

²⁸ Oh, hola re ka tsamaea le Eena nako e lekaneng ho elelloa hoo, e le Eena feela ea nang le Lentsoe la Bophelo bo sa Feleng.

²⁹ Joale Jesu o ne a ena le eng e neng e fapane hakaalo le motho mang kapa mang? Hobaneng A ne a fapane le rabbi? Rabbi e ne e le moprista. E ne e le moruti, moithuti. Mohlomong, a feta Jesu hole, ka thuto ea lefats'e.

³⁰ Ha re na rekoto ea sekolo seo Jesu a se keneng, kapa thuto e tsoang mothong. O ne a sa e hloke. E ne e le Mora oa Molimo. O ne a e senoletsoe, ke Leholimo, hore a etse'ng. 'Me ts'enolo ena ea Leholimo e ne e khahlile barutua bana haholo, hoo Petrose a bile a re, "Re ne re tla ea ho mang, ho fumana See?"

³¹ 'Me ho sa tiile hakaalo bosius bona. Re ne re ka ea kae ho fumana ntho Ena hola re sa tla ho Eena?

³² Joale, ke ngotse fats'e mona, sekhechaneng sa pampiri, mabaka a supileng, kapa lintho tse supileng, tseo, mabaka ao re ts'oanelang ho tla ho Jesu. Ke batla ho bua ka lintho tse supileng metsotsso e mashome a mabeli kapa e mashome a mararo e latelang, pele re rapella bakuli.

³³ Hobaneng, e ne e le eng, Jesu o na a ena le eng, e neng e fapane? Hore'ng e ts'oanetse ho ba Eena feela a Inots'i?

³⁴ Ntho ea pele, Jesu o itse, "Ke 'Na Tsela." Joale, Leholimo le leng feela, le Molimo o mong, le Tsela ea ho fihla Mono e 'ngoe. Litsela ha li ngata, empa Tsela e eang Teng e 'ngoe feela. 'Me Jesu o itse, "Ke 'Na Tsela eo."

³⁵ Joale, re leka ho etsa litsela tse ling. Re leka ho re litsela tse ling li teng. Re na le tsela ea tumeloana, 'me re leka ho e sala morao. Bongata ba rona, ka har'a likereke, re na le tumeloana e itseng eo re—re tiisetsang ho eona. 'Me ho ka loka, bakeng sa meitlamoa ea lehlaku la feiga.

³⁶ Empa ha u ea Leholimong, u tlamehile ho tla ka Jesu, hoba ke Eena Tsela. Tsela e 'ngoe, e eang Leholimong, e ke ke ea ba teng ha e se ka Jesu.

Re na le litsela tseo re li bitsang, "Phutheho ea rona e lebitso."

Ha u botsa motho, kajeno, "U Mokreste?"

"Oh, ke moMethodist."

"U Mokreste?"

³⁷ "Ke moBaptist. Ke moPresbyterian. MoPentecostal, kapa moNazarene, kapa ntho e kang eo." Ha se potso eo.

³⁸ Ho ka ba Mokreste, u tlamehile ho kena ka ho Kreste. 'Me tsela ea ho kena ka ho Kreste e 'ngoe feela, 'me ha se ka litumeloana le ka likereke, empa ka kolobetso ea Moea o Halalelang. Eka khona re tsoaloe labobeli. 'Me ha re tsoetsoe labobeli, eba re ka ho Kreste. 'Me ha u le ka ho Kreste, u kene Tseleng, hoba Eena ke Tsela.

³⁹ Monna o ne a le teng, ka tsatsi le leng Bibeleng, eo Jesu, sets'oants'ong sa Hae se tummeng, a buileng ka eena. Ho thoe, O itse ho kile ha ba le monna oa morui, eaba o etsensa mora oa hae selallo, e tla ba selallo sa lenyalo. 'Me A ntoo mema batho ho tla. 'Me eareha selallo se lokile le tsohle li hlophiselitsoe ho jeoa, baeti bohole ba lulisitsoe. 'Me ha fumanwa monna ea sa aparang kobo ea bohole tafoleng.

⁴⁰ Joale, batho ba bangata ba balang Bibebe ba tseba Lengolo lena haholo.

⁴¹ Eaba Morena o re ho mothaka enoa, "Motsoalle, ke ka'ng u tlileng koano u se na kobo ea bohole?" Ha botsoa potso, "Ke ka'ng u tlileng koano u se na kobo ea bohole?"

⁴² 'Me na le lemohile, Bibebe e buile, ea re, "O ile a hloka puo." O ne a se na boitatolo.

⁴³ Joale, e bile thabo ho 'na ho etela linaha tsa Bochabela ka bona manyalo a Bochabela. Ha a fetoh. Ke setso se ts'oanang, sa likete tsa lilemo.

⁴⁴ Joale, ha ho etsoa selallo sa lenyalo, ho hlomphuo motho, monyali o fa batho bohole ba kena ka likobo, kahobane metsoalle ea hae e etsoa ke mafutsana, barui, le ba mahareng. Empa motho e mong le e mong a mo memang, o fuoa memo, 'me memo ena e ngotsoe lebitso la monyali. 'Me o isa memo ena monyako. 'Me ho na le—le molebeli ea emang monyako, 'me o ts'oere liaparo.

⁴⁵ Ka baka leo, ho fihla monna, ea apereng hantle haholo, 'me molebeli oa monyako o mo apesa, seaparo se tloaelehileng. Monna ea latelang oa fihla, o mahareng, ha a apara hampe hakaalo, empa o fumana seaparo se ts'oanang le se fumanoeng ke morui. 'Me ho fihla motho ea latelang, oh, ntle le pelaelo, empa e re ka ha a memiloe selallong, le tlotla e kaalo ho motsoalle oa hae, o bile o hlatsoa liaparo tsa hae 'me, oh, a hla a itokisa ka mekhoa e mengata, empa o e entse lefeela.

⁴⁶ Ho joalo, le rona, ha ho letho leo re ka le etsang ka eona. Molimo o phethile pholoso ea rona ka Jesu Kreste. 'Me ha se ka seo re ka se etsang, kapa ka lintho tse ngata ha kae tse lokileng tseo re ka li etsang. Homme, ho itoketse, ho ke ke ha bua letho khahlano le hoo. "Empa le bolokehile ka mohau, ka tumelo."

⁴⁷ 'Me joale mofutsana enoa o fumana seaparo se ts'oanang le seo morui a se fumaneng le se fumanoeng ke monna e mong. Joale, ha ba lutse tafoleng, bohole ba ts'oana.

⁴⁸ Joale, ho ile ha etsahala'ng ka monna enoa, ho ile ha etsahala'ng? "O ile a hloka puo," kahobane a ile a tlolela ka lehlabapho, kapa a kena ka monyako o ka thoko, kapa a kena ka tsela e 'ngoe e sa hlophisetsoang eena. 'Me a se ke a fumana seaparo ke hona.

⁴⁹ Ho tla ba joalo ka Letsatsi la Kahlolo. Litsela tse ling li teng. Litsela tsa kereke li teng. Litsela tsa litumeloana li teng.

Litsela tsa—tsa lintho tse fapaneng li teng. Empa Jesu o itse, "Ke 'Na Tsela eo." Mohalaleli Johanne oa 10, O itse, "Ke 'Na monyako oa linku." 'Me batho, kajeno, joale ka ha ba entse mohlang oo, ha ba batle ho nka tsela eo. Ba batla tsela ea bona. Ba nahana e ntse e lokile hakaalo.

⁵⁰ Nakoana e fetileng mona, kea kholoa e ne e le Louisville, ho ne ho ena le mohlankanya. 'Me tsebe e 'ngoe ea hae ena le bothata. Be, a etela ngaka ea hae, eaba ngaka ea hae e mo emela liveke tse 'maloa. 'Me ea 'na ea mpefala. Qetellong, ngaka ea re, "Ke tlamehile ho u isa sepesheliseng."

⁵¹ Ha ngaka e hlahloba bothata, keha e le lebitsohal le leng la bongaka. Leo, ke sa kholoeng, leha nka le tseba, nka khona ho le bitsa, ke ne ke tla lokela ho le ngola fats'e, 'me ke ikoetlisetse lona hora e le 'ngoe, ho le peleta. 'Me le ne le sa tlo tseba seo ke se buileng ha ke le peleta kapa ke le bitsa, hoba ke ne ke sa tl'o tseba seo e ne e le sona, le ho qaleng. Empa keha e le ntho e ka har'a tsebe ea hae, e ka beng e nkile bophelo ba hae. 'Me a re, "Lefu leo le jele setsi haholo. 'Me ha ke tsebe motho ea ka hlahllobang lefu leo ka ts'oanelo, ho sheba ha e le 'nete kapa che, ntle le monna ea itseng ea lulang St. Louis, ngaka."

⁵² Moshanyana a titima a ea St. Louis. Ngaka eo e ne e beile meja fats'e e ile New Orleans. E le motho oa Boroa, ka baka leo a theoha a khutlela New Orleans. Moshanyana a ts'oara sefofane, ka potlako, a titimela New Orleans. Ngaka ea khale ea e sheba, ea re, "Ba e hlahllobile hantle, mora, 'me le se le jele setsi haholo."

Eaba mohlankana o re, "Ngaka, na u tla seha o etse oporeishene?"

⁵⁴ A re, "Che, mora. Nke ke. Letsoho la ka ha lea tsitsa hakaalo." A re, "Joale, ke tseba motho a le mong, lefats'eng lohle, ea ka etsang oporeishene ena." A re, "Monna eo o New York City, o il'o palama a kena phomolong ea likhoeli tse ts'eletseng koana Europa. 'Me ha ke tsebe u ka mo fumana na; 'me leha u ka mo fumana, taba ke hore o tla etsa oporeishene eo. Ke eena feela monna eo ke mo tsebang, oa lefu le sa tloaeloang lena, ea ka etsang oporeishene ena. 'Me u ke ke ua ema. U tla be u shoele likhoeling tse ts'eletseng."

⁵⁵ A re, "Ts'oara mohala. U mo letsetse. Etsa ho hong. Ha ke batle ho shoa. Mo ts'oare, ka tsela e itseng." 'Me qetellong ba fumana ngaka 'me a lumela ho etsa oporeishene.

⁵⁶ Joale, ha mohlankana enoa a na a bua le ngaka ea leqheku, a b'a 'molella bothata ba hae, 'me motho a le mong feela ea n'a ka etsa oporeishene. Ha a ka a sheba ngaka ea leqheku, joale ka ha batho ba sheba moreri ha a 'molella ha Jesu e le eona feela tsela ea ho bolokeha. Ha a ka a sheba ngaka, a re, "Ke puo e ntle, ngaka. Ruri ke natefetsoe ke moqoqo oa hao. Ke tla boela ke khutla ho u mamela, ka nako e 'ngoe."

⁵⁷ Joale, batho ba nka Bokreste joalo. Empa hola ua lemoha hoba ke lefu ho hana Tsela eo. Ke ka baka leo Petrose a itseng, “Re ne re ka ea ho mang? Hoba ke Uena feela ea nang le Bophelo bo sa Feleng. Ke Uena feela, le eona feela Tsela eo Molimo a e ralileng, ’me ke Bophelo bo sa Feleng.”

⁵⁸ Joale, re ts’oanelo ho hopola hore ke Eena Tsela. ’Me ha u le ka ho Kreste, u kena ka ho Kreste ka ho tsoalloa ka ho Kreste. Joale ha ho thuso ho bolella batho ka Tsela, le hore Tsela ke efe, u sa ba bolelle mokhoa oa ho kena ho Eona. Joale, u tsoalloa ho Kreste. U fetoha karolo ea Hae. O fetoha sebopuoa se secha, kapa popo e ncha, ha u tsoalloa ’Musong oa Molimo. U fetoha karolo ea Kreste.

⁵⁹ Mohla ke ne ke tsoalloa lelapeng la Branham, ke ile ka ba Branham ka tsoalo. Motho u fetoha karolo ea Kreste joalo. ’Me tsela ea ho kena Tseleng, ke ka tsoalo e ncha. Ke hantle. Ke ’ona mokhoa oa ho kena Tseleng. ’Me Jesu o itse, “Ke ’Na Tsela.” Re ka qeta nako e ngata mono.

⁶⁰ Empa ntho e latelang A leng eona, Ke Eena ’Nete. Ha ho letho kapa motho ea nang le ’Nete ntlo le Eena.

⁶¹ Oh, kea tseba re fumana boraborapeli, kajeno, ba tsamaeang hohle ba re, “Be, joale, rona re ’Nete. Re na le ’Nete.” Re ea kerekeng e ’ngoe, ba re, “Re ts’oere ’Nete.” U ea kerekeng e ’ngoe, ba re, “Litumelo tsa rona, re ts’oere ’Nete.” Re kena ho e ’ngoe, “Re ts’oere katekisima ea khale. Re na le ’Nete.”

⁶² Jesu o itse ke Eena ’Nete, ka baka leo u ke ke ua fumana ’Nete u sa fumana Jesu. U Mo fumana joang? Ka ho tsoaloa labobeli. Empa u ke ke ua fumana ’Nete pele u fumana Jesu.

⁶³ U ke ke ua ba Tseleng pele u kena ka ho Jesu. U kena joang ka ho Eena? “Ka Moea o le mong re kolobeletsoa bohle ’Meleng o le mong.” U tla be u le ka ho Jesu. U tla be u kene Tseleng. U tla be u le ’Neteng. Jesu o itse, “Ke ’Na Tsela, ’Nete.”

⁶⁴ ’Me ntho e ’ngoe, ntho ea boraro, Jesu, e re tlamang ho tla ho Eena, ke Eena feela Leseli le leng teng. Ke hantle. Oh, re batla ho latola taba eo, empa ke ’neta. Jesu ke lona feela Leseli le leng teng.

U ka re, “Ke moRussellite, moCampbellite.”

⁶⁵ Sohle seo u ka se ts’oarang, ke leseli la bohata. U ka ba kerekeng ea Russellite. U ka ba kerekeng ea Campbellite, kapa “leseling” le itseng la kereke. Empa pele u kena ka ho Jesu, ha u Leseling. U sa ntse u le lefifing. Pele u fihla ho Eena ha u na Leseli. Hoba ke Eena Tsela, ’Nete, le Leseli, le eona feela tsela e eang ho Molimo. “Ha ho motho ea ka tlang ho Ntate ha e se ka ’Na.” Ka baka leo, u ke ke ua fihla ho Molimo, u ke ke ua fihla Leholimong.

⁶⁶ U tlamehile ho kena Tseleng, ’me Jesu ke Tsela eo. Ke eona feela ’Nete e leng teng. ’Me ke Eena feela Leseli le leng teng,

lona feela Leseli la 'nete. Leseli la 'nete, le bonahalitsoeng ke Jesu Kreste. Re fumana leseli la Mormon. Re fumana leseli la Methodist. Re fumana leseli la Baptist. Re fumana leseli la Pentekosta. Re fumana maseli a mefuta, empa Jesu ke Leseli la 'nete. Ke Eena feela Leseli.

⁶⁷ Rona re bana. Ha re fela re tsoetsoe la bobeli, re bana ba Mots'ehare.

⁶⁸ Bana ba lefats'e ba tsamaea lefifing. Ba tsamaea bosiu. Ba rata lefifi. Bibebe e boletse, ea re, "Banna ba rata, batho ba rata lefifi ho feta leseli, hoba leseli le ee le bonahatse mesebetsi ea bona."

⁶⁹ E re letsatsi le chabe, mokholutsoane o mong le o mong oa khale, kokoanyana ka 'ngoe ea khale, kokoanayana ea 'muso oa lefifi, e hahabang bosiu, e tla itsoaketsa ka ntho. Ho joalo ha Leseli la Evangelie le chaba, ketso e 'ngoe le e 'ngoe e mpe e tla leka ho khasetsa tlas'a ho hong. "Oh," ba re, "re na le—re na le leseli, ka hobane re—re phela bosiu." Ha u tsamaea leseling nakong ea bosiu, o tsamaisoa ke leseli la maiketssetso. Ho na le leseli le le leng la 'nete la mots'ehare. Ke leseli la letsatsi.

⁷⁰ Ho na le Leseli le le leng la 'nete la Mokreste, 'me Leseli leo ke Leseli la Mora oa Molimo. Ke Eena feela Leseli la 'nete. E.

Bophelo bo fumanoa ho Eena, hono, ruri joale kaha leseli la letsatsi le hlahisa leseli.

⁷¹ Bophelo bohole ba limela bo tlisoa ke leseli la letsatsi. Selemo se fetileng, kamoo mariha a ne a hoamme kateng le ntho e 'ngoe le e 'ngoe. Empa hang feela ha letsatsi le qala le tolisa lefats'e, ha etsahala'ng? Bophelo bo bocha bo nyoloha, bo nchafetse.

Ke ne ke qoqa le monna e mong, Mongh. Woods morao mane. Re ne re le Kentucky. Ka kopana le monna 'me ho thoe ke mohetene ea sa lumeleng. Ke sa tsoa utloa hore o iketse. 'Me eena, Mongh. Woods, a nyoloha a mo kopa ho re lumella ho tsoma mesamane ea lifate sets'eng sa hae. A re, "Ehlide bo, u ka tsoma mesamane, Banks. Tsoela pele hantle."

A re, "Ke tlie le moruti oa ka."

⁷³ A re, "Ha u re u oele ha kaalo, Woods, hoo u tlamehileng ho tsamaea le moruti ka linako tsohle?" 'Me a re . . .

⁷⁴ Ka tsoa koloing ka atamela mono, ho ena le sefate se seholo sa apole, eena le monnamoholo e mong oa seithati ba lutse tlas'a sona. 'Me eaba ke thonaka apole ke qala ke e ja. 'Me 'na le eena re ntse re qoqa. 'Me ke tseb- . . . Moena Woods o ile a mo tsebisa. Joale ka . . . Ho re, "Kopana le moruti oa rona."

⁷⁵ 'Me ka re, "U phela joang, monghali?" 'Me ra 'na ra qoqa nakoana, 'me a qalella ho bua ka, be, ka hore ha eso ee kerekeng, a bile a sa tsebe ha eba a ile a lahleheloa ke letho.

Ka re, “Oh, ee, o lahlehetsoe.” Ka mo tlohellaa bua nakoana.

⁷⁶ ’Me ka morao ho nakoana, a re, “Ho kile ha fihla moreri mona Campbellsville, kapa Acton, ke motsana, holimo mona sets’eng sa Methodist.” ’Me a re, “Moreri eo o ne a eso etele naaha ena pele. ’Me bosiung bo bong ha a nts’aa rera holimo mono, kopanong ea masiu a mararo, o ile a sheba tlase har’aa lets’oele, a bona mosali ea lutseng mono, a ‘molella hore o ne a ntse a rapella khaitseli ea hae ea n’aa lula leralleng mona, a bolaoa ke mofets’ee. Ho re, ‘U na le sakatuku ka har’aa bukana ea hao. ’Me a re, ‘Nka sakatuku eo u e bee holim’aa mosali, ’me o tla fola.”

⁷⁷ Ho re, “Hoseng hoo, ’na le mosali re ne re le teng holimo mono.” ’Me a re, “Re ne re ile ra phuthela mosali eo ka lesela la moalo. A eso tsoe malaong lilemo tse peli, kapa ho feta. Mofets’ee oa mala. A bile a sa khone ho boloka metsi ’meleng oa hae.”

⁷⁸ ’Me a re, “Kahitseli eo o ile a tsoa ts’ebpletsong, a tloha bosiung boo, ’me a fihla a bea sakatuku holim’aa mosali.” ’Me a re, “Hoseng ho latelang, keha a pheha mahe, le nama ea kolobe, ’me a lokisa lijo tsa hoseng, ’me a ja.”

⁷⁹ ’Me a re, “Ha e sa le a le teng holimo mono. E se e le lilemo tse tharo kapa tse ’ne tse fetileng, ’me,” a re, “o sa ntse a phetse.”

⁸⁰ A re, “Joale, ha a ka etela naaha ena hape, ke tla mo mamela.” Ho re, “Kahobane, o ile a hlahisa ntho e hlakileng ho feta ho bala mantsoe a mangata. E ile ea tsebahatsa ntho e neng e phela le e ntseng e phela. O tsebile joang hoba mosali o ne a lula holim’aa leralla mono?”

⁸¹ Ka sheba Moena Wood ’me ka sisinya hloho ea ka. ’Me keha ke eme mono, ke tletse seretse, le mali a mosamane, le ntho e ’ngoe le e ’ngoe, ka baka la ho tsoma. A sa nahane e ne e le ’na ea n’aa nts’aa rera holimo mono. Ka baka leo yena a—a ema mono nakoana, kapa a lula mono, ke rialo.

⁸² ’Me ka re, “Monghali, u re, ha u ka bona ntho e ts’oanang le Molimo, Molimo o ile oa etsa mohlololo?”

⁸³ “Oh, ee,” a re, “hoo ho tla nketsa hore ke lumele.” Ka re, “E, monghali.” Ka re, “Lilemo tsa sefate see sa apole li kae?”

⁸⁴ A re, “Se na le lilemo tse mashome a mararo le lethonyana. Ka na ka se lema mono, ka selemo sa hore-le-hore.”

Ka re, “Selemo se seng le se seng ha se fihla, se bea liapole?”

“E.”

⁸⁵ Ka re, “Mona e batla e le mahareng a Phato. Ha re eso fumane mohatsela hang kapa serame se batang hang.” Ka re,

“Ha re eso fumane maemo a leholimo ho hang, ha e se lehlabula le chesang. ’Me u mpolelle hobaneng, ho tla ka’ng, ha mahlaku ao a foforeha sefateng seo?”

A re, “Lero le khutletse mobung.”

⁸⁶ Ka re, “Hola le sa khutla, sefate seo se ne se tla shoa nakong ea mariha?”

⁸⁷ “Ke ’nete. Ha lero le lula sefateng, le a se bolaea. Le tlamehile ho theohela metsong ho ipata.”

⁸⁸ Ka re, “Mpolelle ntho, e etsang hore lero leo, mona mahareng a lehlabula, ke bohlale bofe bo le isang metsong, le tle le phele har’a mariha, ho boela le khutla sehleng se latelang sa selemo, ho u hlahisetsa kotulo e ’ngoe ea liapole. Ke tla u bolella, ke ’ona Moea oo o mpoleletseng ho laela mosali eo ho ea bea sakatuku holim’hae. Ke Molimo ’ona oo.”

A re, “Ha u moreri eo?”

⁸⁹ Ka re, “E, monghali, ke eena.” Ka re, “U a bona, u sheba ntho e ka ntle ts’ebeletsong, athe Molimo o u teetse hare, hohle. U ka se hholehe ho E bona. Sheba tlhaho.”

⁹⁰ Joale, batho ba bang ba ka hana ho tsamaea leseling la letsatsi. Ha ho ne ho ena le motho ea joalo? Ea ka re’ng, “Oh, letsatsi ha lea chaba. Che, monghali. Ha ke lumele.” A ntoo mathela mokatong oa hae o ka tlase. Ho re, “Ke tla tsoa ha ho fifetse feela. Ha ke tsoa . . .” Ha a batle thuso ea letsatsi. Che, ha a etsa joalo, ke—ke bothotong ba hae. Ke phetho. Letsatsi le chabile. Motho o hlaha fesetereng o hoeletsa a re, “Tsoa, John, letsatsi le chabile.”

⁹¹ “Ke hana ho lumela mepoto e joalo. Ke bohlanya.” Joale, ruri o lahleheloa ke mofuthu oa letsatsi. Ruri o lahleheloa ke mahlaseli a fanang ka bophelo a tsoang ho lona. Ruri o lahleheloa ke bottle bo tsoang ho lona, le bophelo bo tsoang ho lona.

⁹² Ke eona tsela, monna kapa mosali ea lekang ho fihla Leholimong ka tumeloana, ho leka ho ea Leholimong ka kereke, ka ntle ho Jesu. U ke ke ua khona. Ke Eena Tsela, ’Nete, le Leseli.

⁹³ Joalekaha s-u-n [letsatsi—Moft.] le hlahisa bophelo ba semela, S-o-n [Mora—Moft.] o hlahisa Leseli le sa Feleng. Ke Eena feela ea nang le Leseli le sa Feleng. Ke ka baka leo re tlamehileng ho tla ho Eena. Re tla e fosa ka kereke. Re tla e fosa ka tumeloana. Re ka tla ho Eena feela ’me ra fumana Leseli le sa Feleng. Eena feela. Petrose o itse, “Ke Uena feela Ea nang le Lona. Ke ’ona morero oa rona oa ho ba mona. Re tla ho Uena, ho Le amohela.”

⁹⁴ Joale, u shebe ha letsatsi leo le qalella ho chaba, khele, ha ho letho—ha ho peo e ke keng ea phela. Ha ho letho leo e ka le etsang.

⁹⁵ Ha u haha 'motomoto tseleng ea hao, kapa tselaneng ea hao, u ts'ela samente, u e etsa bophara ba maoto a mane. 'Me u re letsatsi le chabe, joang bo a mela, u fumana joang bo bongata ho kae? Hantle feela mosikong. Ke eng? Ke metso ena. U ke ke ua patela bophelo letsatsi. Ha letsatsi le chaba, metsonyana eo e tsoelikana lijarete tse lekholo, ha ho hlokeha, 'me e nyolohe. Ke joang bo neng bo le tlasa 'motomoto. Ke bo neng bo le ka tlase mono, maseli a chabile. 'Me ha leseli le chaba, bophelo bo hlahisoa ke boteng ba lona.

⁹⁶ 'Me ha Mora oa Molimo a chabela pelo, Bophelo bo sa Feleng bo a hlaха.

⁹⁷ "Ke 'Na Tsela, 'Nete, le Leseli." Ke mabaka a mararo ao re tlamehileng ho tla.

⁹⁸ La bone, ke lena, Jesu ke 'ona feela Motheo o bolokehileng o tiileng oo ntho efe kapa efe e ka hahuang holim'a 'ona. Ke hantle. Ke 'ona feela Motheo oo ho ka hahuang holim'a 'ona. Metheo e meng eohle ke lehlabathe le tebang.

Ke ema holim'a Kreste Lefika le tiileng.
Mobu 'ohle ke lehlabathe le tebang.

⁹⁹ Ba ba bangata ba haha holim'a maruo. Ba leka ho sebetsa, ho sheba kamoo ba ka etsang chelete e ngata. Ba re, "Ha ke sa khone ho e sebelisa, bana ba ka ba ntlahlamang, ba tla khona." O etsa'ng? E khutlisetsa bokhobeng. U fetoha lekhoba la chelete ea hao. Mohlomong batho ba bangata ha ba... Ha u a tlameha ho ba ralimilone ho fetoha lona. U ka lakatsa chelete feela, 'me ua ba molato hakaalo ka ralimilione. U a bona? Liheleng, ho tla ba le boralipeni ba lekanang le boralimilione. Hobane, ke boits'oaro ba hao khahlano le sona, seo u se filoeng ke Molimo. Joale, ha u e haha holim'a maruo, e tla oa.

¹⁰⁰ Hape ho na le ntho e kholo eo Amerika e lekang ho haha holim'a eona. Ke ho leka ho haha holim'a motheo wa botumo. Bananyana, bashanyana, baa ba sheba, likhalala tsa thelebishene, likhalala tsa lits'oants'o, ba leka ho ba etsisa, ho apara joale ka bona, ho ts'oants'isa le bona. Hoo ho etsa'ng? Ho isa bophelong bo senyehileng ba tlokotsi. Ke mooko le litlhaka, li tla chesoa Kahlolong.

¹⁰¹ Jesu ke 'ona feela Motheo, 'ona feela Motheo o tiileng. Ke ka baka leo re tlamehileng ho tla ho Eena. Ha ho motho ea nang le Motheo oo. Maruo ha a na Oona. Botumo ha bo na Oona.

¹⁰² 'Me, kajeno, re fumana metheo e mengata ea ho haha. Oh, re batla... Re feela... Batho ba Amerika ha ba khone ho etsa letho; ka Sontaha ba loketse ho—ba loketse ho etsa motero; ba tlamehile ho etsa sena. Le etsa'ng? Lea elella ke'ng? Mohaho oa hao u tla thuhakangoa likoto, kapele. Motheo oo ke lehlabathe le soahlamanang.

¹⁰³ Bongata ba rona, re haha holim'a thuto. Ha re khone le ho isa mesuoe likolong, tseo re buang ka tsona. Joale, ho itoketse. Sekolo se itoketse, tulong tsa sona, empa se ke ke sa nka sebaka sa Kreste. Che, monghali. Joale re fumana... Ha re khone le ho fumana mesuoe. Bana ba rona ba khohlahetse haholo, hoo batho ba sa batleng le ho leka ho ba ruta. Oswald e monyenyan, le—le—le Les, le bao bohle, ba tla leleka mesuoe ba e nts'e mohahong. Ba tla bopa khanyetso. Ba tla luma. Ba tla koala sekolo. Ha ke ba qose, nke ke ka ba mosuoe oa sekolo, le 'na, ha nka tsoa ho bona.

¹⁰⁴ Empa re bua ka thuto. Joale, hoo ho itoketse, thuto. Ha re batle sehlopha sa batho ba sa rutehang, empa re batla thuto e be malulong a eona. Empa bothata ba eona, kajeno, re lekile ho koetlisa sefala sa rona. 'Me hoba re etse, re nts'itse Tsela. 'Me Kreste ke Motheo oo le Tsela eo. Ha re bea thuto... Thuto e itoketse.

¹⁰⁵ Empa, mamelang, hangata, thuto isa letemoneng la thuto. 'Me letemona leo la thuto le u isa ho tsebanyane. 'Me ha u fihla mono, ebe u fetoha mohetene, 'me u hana Kreste. Ka baka leo u ke ke ua haha holim'a thuto.

¹⁰⁶ Le joalo re ke ke ra haha holim'a matla a lipolotiki. U re, "Be, banna, ke tsotella haholo. Ke Modemokrate. Ke Morephaboliki. Ke..." Mekha eo e bolile ka bobeli.

¹⁰⁷ Ho na le Motheo o le mong feela. Haha holim'a Kreste. Sechaba sena ha se hloke ho haha holim'a motheo o mong ntle le Jesu Kreste. Hantle. Ha ho motheo o mong o beiloeng; ha ho motheo o mong, u ka kenang Leholimong ka 'ona. Ha ho motheo o mong o tiileng, ka ntle ho Motheo oa Jesu Kreste.

¹⁰⁸ Nakoana e fetileng, koana New York, ke ne ke palame le motsoalle oa ka, moreri. 'Me ka re, "Oh, mohaho o moholo oo! Oh!" Ka re, "Sheba mono. Ke kholoa o ena le mekato e mashome a mahlano, kapa e mashome a ts'eletseng. Khele! Ke sebaka se seholo sa se tonana. Se setle hakakang!" Ka re, "Be, ha ho motho ka mono."

A re, "Che, 'me a ke ke a ba teng."

¹⁰⁹ Ka re, "Molato ke'ng?" A ntekanyetsa litjeho tsa mohaho, koana limilioneng, ho haha mohaho oo.

"Be," ka re, "hobaneng motho a sa kena ho 'ona?"

¹¹⁰ Ho re, "Eitse mohaho o se o tla fela, o ferefiloe ka ntle, le ntho e 'ngoe le e 'ngoe," ho re, "ba fihlela motheo o ne o sa loka. O ne o theiloe holim'a lejoe le itseng le thellang, e se lejoe la 'nete, ka baka leo mohaho oa phumuloa. O ile oa sebelisetsoa ntho e le 'ngoe feela ke hona, hore rakonteraka a hloelle qhooeng ea 'ona 'me a itihele fats'e, ho ipolaea."

¹¹¹ Ho sa tsotelehe bokantle bo shebeha hantle hakakang, ha ho motheo o mong o tiileng, ka ntle ho Motheo oa Jesu Kreste. Ke Eena Motheo oa 'nete moo ho ka hahuoang teng.

¹¹² Mexico, ke motse o motle; nkile ka fihla mona, lilemo tse 'maloa tse fetileng. Moo leseanyana, lesea le shoeleng...

¹¹³ Ke ile ka palamisa motho ka har'a motse nakoaneng e fetileng, a tahiloe ho tahoa, ka tla le eena. Eaba o re, "Nkile ka u bona u ema, Mohlomphehi, Ngaka, kapa ntho e 'ngoe." Ke Mokatolike, ha a bolela. 'Me a re, "U tsosa ngoanana, ea shoeleng a boela a phela. Ke," ho re, "ha e sa le ke u hlompha."

Ka re, "U tseba Jesu?"

A re, "Ke Mokatolike."

¹¹⁴ Ka re, "Ha kea u botsa kereke ea hao. Ke itse, 'U tsebile Jesu na?'"

¹¹⁵ Eaba ke 'molella pale ea mosajana enoa oa Mokatolike ea emeng ka ntle mono ka hora ea borobong hoseng, a nkile lesea le shoeleng matsohong a hae, ho fihlela mashome a mararo ka morao ho leshome bosiuung boo. Pula e ts'oloha, le kamoo Morena a ileng a busetsa leseanyana leo bophelong. Ka se ke ka ba lumella ho e tsebisa pele ngaka e e tsebisa. Ha thoe, "Lesea le shoele." A le tlaleha le, "shoele," ka hora ea borobong hoseng hoo. 'Me mona ke bosiuung boo ka mashome a mararo ka morao ho leshome. 'Me leseanyana le sa ntse le phela kajeno, ka moo ke tsebang.

¹¹⁶ Joale, 'me motseng oo, ke motse o motle. Empa mehaho eohle e qala e oa ka seetse, kahobane ba ile thohothela boahi ba mehla ea kajeno, ho haha mehaho e metle e bents'itsoeng. Etsoe, ke belaela ho se sebaka se ka o fetang lefats'eng, ka botle. Empa ha ba ka ba cheka ka ho lekana ho fihla lefikeng.

¹¹⁷ Ke bothata ba likereke tsa rona kajeno, motsoalle. Ke bothata ba kereke ea Baptist, Methodist, Presbeterian, Pentekosta, ma-Nazarene. Re tlamehile ho cheka, joale ka batho, 'me re sa its'etlehe ka likereke tsa rona. Re tlamehile ho cheka, ka borona, re be re fihle Lefikeng leo Jesu a itseng, "Holin'a Lefika lena Ke tla haha Kereke ea Ka, 'me lingalo tsa khoro ea bafu ha li ka ke tsa E hlola." Ke Eena feela Motheo o tiileng, oa 'nete.

¹¹⁸ Joale, ntho e 'ngoe, bohlanong, ke tla lokela ho bolela ena. Ke Eena feela khotso e atlehileng le thabo e tiileng. Ke lebaka la rona la ho tla ho Eena. Oh, kea tseba motho a ka ts'eha joale ka tseketske, kapa ua tsoa mona ua keketeha ua ba ua habeea, u ts'eha motlae o bulutsoeng ke khalala ea lits'oants'o, kapa ntho e 'ngoe. Kapa motho e mong, u ka noa haholo, 'me ua keketeha sekä lehlanya le itseng, empa hoo ha ho tlise khotso. Khotso e 'ngoe ha e eo, le thabo e 'ngoe ha e eo, e ts'oanang le ea ho tla ho Jesu Kreste.

¹¹⁹ Ke bone batho ba iketsisa. Ke bone basali ba bacha ba leka ho ikhalimisa ka mese ea boea, 'me ba etse eka ba thabile. Ha ba thaba. Ba mpa ba besa mollo o takiloeng. U ke ke ua futhumatsoa ke mollo o takiloeng.

¹²⁰ Le bone bahlankana ba lekang ho nahana hore mesifa ea hae e meholo hoo u ka khokhothelang sepekere u sa ba thetse, le hore thipa e kobile lehare la eona ho eena. 'Malle lilemo tse 'maloa feela, 'me o se a tsofetse a sosobane. Thabo e sa Feleng ha e eo ka ntle ho Kreste.

¹²¹ Shebang mona. Ke tla bea... Mang le mang oa lona mona, bosiung bona, ea atlehileng 'meleng, lelapa la hao le atlehile 'meleng, bohle ba u potileng. U re'ng ka 'me ea sieo mona? U tseba joang hobane ntatao ha a shoe hona joale? U tseba joang hobane e mong oa bana ba hao ha a bolaoa, metsotsong e 'maloa e fetileng, hole le mona? U tseba joang hoba ha ho letho le hlahileng? U tseba joang hobane u tla tsoa mohahong 'ona bosiung bona? U ka 'na ua oa u bolaoa ke pelo. Ha u tsebe. Ka baka leo thabo e sa Feleng ha e eo ka ntle ho Kreste. Ke ka hona re tlamehileng ho tla ho Eena.

¹²² U ka fumana wiski. U ka itaha monateng. U ka rua lintho tsa lefats'e. Empa ha se thabo e hlolang. Ha ho letho le ka fanang ka khotso joale ka Eena. U fana ka khotso.

"Oh," u ka re, "ke na le khotso."

¹²³ Ha u feelsa u na le khotso ea 'nete, u fumane Jesu. Ha u se na Jesu; pele u fihla ho Eena ha u tsebe le seo khotso e se bolelang.

¹²⁴ Ke bone batho, marena, mahosana, banna ba phahameng, boramabelo, likhalala tsa lits'oants'o, le ntho tseo tsohle. Ha ba na khotso. Ba shebang. Shebang mahlo a bona metsotso e 'maloa. Ke boramethapo. Le a bona?

¹²⁵ Ha ho monna, ha ho basali, ha ho ngoana, ha ho motho ea ka fumanang khotso ka ntle ho Jesu Kreste. "Ke le fa khotso ea Ka. E seng joaloka lefats'e, kamoo Ke le fang kateng." Le a bona? E seng kamoo lefats'e le le fang khotso, empa O na le khotso e sa Feleng, khotso e phomotseng. Leha u phela, leha u shoa, leha pula e ka na kapa letsatsi la chaba, u na le khotso, leha ho le joalo.

¹²⁶ Ke rata sefela sa khale seo Moena Shakarian a se binang, motho oa khale oa senatla, e moholo, o bina, "Ke fumane khotso e kang ea noka, ke fumane khotso e kang ea noka." Khele, ke 'nete. Ha u na le khotso, u na le Kreste. Kreste ke khotso ea hao. Ka baka leo re ts'oanetseng ho tla ho Kreste, ho fumana khotso.

¹²⁷ Joale, ho sa na le ntho eo ke batlang ho e bua, bakeng sa ntho ea bots'elela. Eena, kapa... E. Ntho ea bots'elela, ke Eena feelsa leruo la kamehla. Mpolelleng ntho efe feelsa eo le ka e fumanang, le ka e ruang, e ka hlolang ka ho sa Feleng, ka ntle ho Jesu Kreste.

¹²⁸ Haha ntlo e ntle. Fumana milione oa lidolara. Eba mosali ea tummeng ka ho fetisia naheng. Monna ea matla ka ho

fetisisa ea kileng a tsamaea literateng. Eba mothuhi oa lirekoto, moloanelia likhau, ntho efe feela u batlang ho ba eona. U shebe haeba u sa omelle, o sa kokobele 'me u shoa. Hantle. Ho tla nka matsatsi a 'maloa feela ho etsa joalo.

¹²⁹ Ka baka leo, leruo le sa Feleng le leng teng, ke Jesu Kreste. Moo, ha eba E le ntho e khabane le e fetisang eo re ka e ruang, ha re—ha re etseng hoo leruo la rona. Re etse bonnete ba hoba re fumana Eena. U ka ba moreri, u ka ba molisa, o ka ba motikone, u ka ba setho sa kereke; empa leruo la hao ha le se na . . . Mohlomong u fihletse ho re, "Nke ke ka khaotsa pele ke eba moreri. Nke ke ka khaotsa pele ke eba motikone. Nke ke ka khaotsa pele ke eba setho sa kereke." Lintho tseo tsohle li lokile, li a hlompheha. Empa, mamela mona, moena, u se ke ua ema ua haelloa ke Jesu Kreste, u tla be u sa fumana leruo le sa Feleng. Hobane, molisa oa hao, ee, mosebetsi oa hao oa bolisa, o tla fela kapele. Mosebetsi oa hao oa motikone o tla fela. Lengolo la hao la kereke le tla be le lebetsoe ke likelello tsa batho, nakoaneng e khuts'oane e tlang. Empa ha u ruile Jesu Kreste, u tla be u ena le Bophelo bo sa Feleng, 'me u ke ke ua shoa le ka mohla.

¹³⁰ Joale, qetellong, ke batla ho bua sena. Lebaka le leng leo re tlamehileng ho tla ho Jesu ka lona ke lena. Ke Eena feela ea nang le phetolo. Ke thabetse hoo. Oh, ke ikutloa ke tletse borapeli ke hona. Ke Eena feela Ea ka fetolang. E, monghali.

¹³¹ Ke tla le bolella lebaka. U ka ea levenkeleng hoseng, kapa hoseng ha Mantaha, kaha hosasa e le Sontaha. U ka ea levenkeleng la meriana ua ithekela moriana o tla u halaletsa hoo o ka u fetolang ua kena Khanyeng. E re—e re ngaka e u etse oporeishene, e ka u fetolang ho u nts'a lebitleng ho kena Khanyeng. Motho u hlalefa le ho ruteha hoo u khonang ho haha tora e 'ngoe hape ea Babele; pheletso ea eona e tla ts'oana. Iphumanele. Ak'u leke ho nka tsela e 'ngoe, 'me u fumane.

¹³² Ke ba leng ka ho Kreste feela bao Molimo a tla ba hlahisa 'moho le Eena. Phetolo e ka hlhang ho tloha lefats'eng ho ea Khanyeng ke ka Jesu Kreste. Ke Eena feela phetolo e leng teng, mokhoa feela oa ho fetoloa. U ke ke ua e reka. U ke ke. U ke ke ua e sebeletsa. U tlamehile ho e amohela. Ke mpho ea hao. Phetolo ea Molimo, ho u nka.

¹³³ U ka theohela mona ua reka moriana o ka u fetolang, ho tloha ho monnamoholo kapa mosalimoholo, ho khutlela ho mohlankana le moroetsana. Sheba hore u ka u fumana na. U ke ke ua khona. Ha o ka ke oa fumanoa, selikalikoeng sa bongaka ba meriana. Ha o ka ke oa fumanoa selikalikoeng sefe kapa sefe ka ntle ho Jesu Kreste.

¹³⁴ Empa O itse, "Ea jang nama ea Ka a noa Mali a Ka o na le Bophelo bo sa Feleng, 'me 'Na ke tla mo tsosa matsatsing a ho

qetela, ho mo fetola, ho mo isa Khanyeng.” “Mohla motlotloana ona oa lefats’e o senyehang, motlotloana ona oa lefats’e o senyehang, re na le o re emetseng.” Phetolo, ho fetola matlo, ho tloha sebakeng se seng ho ea ho se seng. Ke Eena feela ea nang le Bophelo bo sa Feleng. Ke Eena feela ea nang le thabo.

¹³⁵ Na nka bua sena, hape? Ke Eena feela . . . Ke ho Eena feela sebaka seo le ka eang ho sona, moo le ka ’Monang. Sona feela sebaka seo le ka khonang ho Mo utloisia, keha le kena ka ho Eena. Le lokela ho kena ka ho Eena, hore le tle le e utloisia. Ha ho se joalo, le tla—le tla lelera feela le thulaka ka lihloho tsa lona. Le tla hakanya feela. ’Me le tla . . . E tla ba selotho ho lona. Le ke ke la e utloisia.

¹³⁶ Ke ka hona ba-Jude bao, mehleng eo, ba itseng, “Khele, Motho enoa ke Belsebule. Motho enoa ke *sena, sane*, le se *seng*.” Ha ba ka ba tla ho Eena. Ba sa ka ba Mo amohela joale ka Tsela. Ba sa ka ba Mo amohela joale ka ’Nete, joale ka Leseli, joale ka Motheo, joale ka oa Pele, joale ka oa Morao, joale ka Alfa, Omega, lintho tsena tsohle tseo A leng tsona. Ke Tsohle-ho-Bohle. Ke lona lebaka ba sa kang ba Mo utloisia mohla ba ne ba ’Mona.

¹³⁷ Filippi o ile a nyoloha, a ea lata Nathanaele, a tla le Nathanaele. ’Me Nathanaele, Jesu . . . a ema ka pel’ a Sefahleho sa—sa Jesu. Ha Nathanaele a fihla ka pel’ a Sefahleho sa Jesu, ke rialo, Jesu a mo talima a re, “Bonang mo-Iseraele eo ho seng thetso ho eena.”

Ho re, “Rabbi, U ntsebile neneng?”

¹³⁸ Ho re, “Le pele Filippi a u bitsa, u lutse tlas’ a sefate, Ke u bone.” Bao bora . . .

¹³⁹ Bareri ba eme mono, baprista, ba re, “Monna enoa ke Belsebule. O na le Motemona. Ke senohe-ramahlohonolo.”

¹⁴⁰ Jesu a re, “Le ka bua joalo khahlano le ’Na, Ke tla le ts’oarela hona. Empa Moea o Halalelang o tla fihla ka tsatsi le leng, o etsa ntho e ts’oanang, ’me lentsoe le le leng khahlano le Oona ha le ka ke la ts’oareloa, lefats’eng lena kapa lefats’eng le tla tla.”

¹⁴¹ “Le khona joang,” A rialo, “le Nkahlola joang, athe lentsoe la lona le re le ‘melimo’? Efela ha bao Lentsoe la Molimo le tletseng bona ba bitsitsoe ‘melimo,’ le Nkahlola joang ha Ke re Ke Mora oa Molimo?”

¹⁴² “Hola le tsebile Ntate, le ka be le tsebile, le ’Na.” Ke ’nete. A re, “Ha ho motho ea ka tlang ho ’Na, a sa huloe ke Ntate.” Ha ho motho ea ka tsebang Molimo, ha Kreste, a sa amohele Kreste. U ke ke ua utloisia pholiso ea Khalalelo.

¹⁴³ Khele, motho o re, “Jesu Kreste e sale eena maobane, kajeno, le ka ho sa feleng.” Molisa e monyenyanne a ka e ruta mona.

¹⁴⁴ Bang ba lona le ka ingoaea hlooho la re, “Ah, ha ke e lumele.” Le a bona? Ha ho maemo a hore u e lumele. E amohele, ka tumelo, ’me joale u tla e bona.

¹⁴⁵ Jesu o itse, “Ho se ho se hokae, ’me lefats’e ha le sa tla Mpona, ke hore, tsamaiso ea lefats’e ha e sa tla Mpona. Empa, lona le tla Mpona; lona, molumeli, hoba Ke tla ba le lona, le ka ho lona, ho isa pheletsong ea lefats’e. Mesebetsi eo Ke e etsang le tla e etsa le lona. Le tla etsa le mengata ho ena, kahobane Ke ea ho Ntate. Ke ea tsamaea, Ke ntoo boela ke e ba le lona.”

¹⁴⁶ Nikodema o kile a botsa potso. “Nka boela ka tsoaloa joang. Ke se ke tsofetse. Ka boela ka khutlela popelong ea ’me la bobeli?”

¹⁴⁷ A re, “Motho ha a sa tsoaloe la bobeli, o sitoa ho bona ’Muso oa Molimo.” Joale, photolelo ea ’nete mono ke “utloisia,” ho utloisia ’Muso oa Molimo. ’Muso oa Molimo o ka ho lona, ka baka leo ha le ka ke la O bona, ha le sa O bone o sebetsa. Empa mokhoa o le mong oa ho O utloisia, e ka khona u tsoaloe la bobeli. Ho tsoaloa la bobeli, u tlatsitsoe ka Moea oa Molimo, joale u ka ho Kreste. ’Me ha u le ka ho Kreste, Moea o Halalelang o ngotseng Bibele, o bonahalitseng Kreste, o ka ho uena, O a Ipakela. Amen. Ke ka baka leo u ts'oanelang ho tla ho Eena.

¹⁴⁸ Ke bona bothata ba Amerika kajeno. Likopano tsena li haotse le naха, ho tloha bochabela, bophirima, leboea, le boroa. Ke ka baka leo qhomane ea atomo, e tseteletsoeng sechaba sena. Ke ka baka leo ts'enyeho e leng haufi. Ke kahobane mesebetsi ea Molimo e bonahetse, ’me batho ba tloha ba sa E amohela, kahobane ba sa ’Matle. Ba Mo soabela. Oh, ha ba soabele kereke ea bona. Ha ba soabele borapeli ba bona. Empa ba soabela Jesu Kreste.

¹⁴⁹ Mohla baapostola ba ne ba ngala kereke ea bona, ’me ba amohela kolobetso ea Moea o Halalelang mane Pentekosta, ’me o ba thekelisa eka banna ba mataaoa, ba bua ka lipuo li sele, ba tsoella joalo, ba etsa joalo, ’me ba folisa bakuli, le lintho tse joalo. Le joalo ba ile ba bitsoa sehlopha sa batho ba—ba sa rutehang, ba se nang tsebo. Bibele e itse, “Ba ne ba sa bala e le batho feela. Empa ba lemoha hobane ba tsamaile le Jesu,” kahobane ba ne ba sebetsa joale ka Eena. Ba tseba hoba bophelo ba Hae bo ne bo le ka ho bona, kahobane ba ne ba etsa mesebetsi eo A e entseng.

¹⁵⁰ Jesu o ile a re, ho Mohalaleli Johanne 14:7, “Ea lumelang ho ’Na, mesebetsi eo Ke e etsang o tla e etsa le eena.” Ke moo. Ke baka leo re tlamehang ho tla ho Kreste kajeno.

¹⁵¹ Ke lumela Kreste a tla kapele. Ke lumela re fihlile pheletsong ea tsela. Ke lumela lichaba li ntse li pshatleha. Ke lumela nako ea qetelo e atametse. Kea tseba ho joalo. Hantle-ntle, ruri kea e tseba. Ke tla tsoela pele, ke re, “Kea lumela

hore kea e tseba.” Re fihlile pheletsong ea tsela. Hore ke matsatsi a makae, ke lilemo tse kae, kapa liveke, ha ke tsebe. Ha ho motho ea tsebang. Esita le Jesu; O itse, “Ke Molimo ea e tsebang; a ’nots’i.” Ha ke tsebe mohla e tla hlaha, e tla hlaha horeng efe. Empa kea tseba e tla ka pele, hoba tsena e le tsona lintho tse tlamehileng ho hlaha pele ho ho Khutla ha Hae.

¹⁵² Ha nke ke le qophelle, bosiung bona, motsoalle ea ka ntle ho Kreste. Ha u batla Motheo a tiileng, Tsela, ’Nete, le Leseli, u amohele Jesu Kreste e le ’Moloki oa hao ’me u tlatsoe ka Moea oa Hae. ’Me e tla re ha Moea Hae o tsamaea, u tla tseba Moea oa Hae.

E ne e le bothata ba bona mohlang oo. Ba ile ba ’Mona.

¹⁵³ Mosali ea selibeng, o na a tseba Molimo ho feta halofo ea bareri, ba letsatsi leo. Khele, hang feela ha ba ’Mona, mosali a . . . A ts’oana le mo-Jude feela, monna feela. ’Me A re ho eena, “Mosali, Mphe metsi.”

¹⁵⁴ A re, “Khele, ha se ts’oanelo ea lona ba-Juda ho kopa Basamaria lintho tse joalo.”

¹⁵⁵ A re, “Empa hola u tsebile Ea buang le uena, u ka be u Nkopile metsi. Ke tla u nea Metsi ao u sa tlang ho a kha mona.”

¹⁵⁶ A ’na a bua ho fihlela A mo lemoha, a mo ts’oara, phoso ea hae. E mong le e mong oa rona o tseba se ne se le phoso. Rona ma-Amerika re lumela e ne e le mofebi. A ena le banna ba bahlano, a phela le oa bots’elela.

Ka baka leo A re, “Ea lata monna oa hao, le tle koano.”

A re, “Ha ke na monna.”

¹⁵⁷ A re, “U buile ’nete. U bile le ba bahlano, le eo u lulang le eena ha se monna oa hao. U buile ’nete.”

¹⁵⁸ A re, “Monghali, kea lemoha hobane U moporofeta. Joale, rea tseba, Messia mohla A tlang, O tla Itsebisa rona ka tsela eo. Rea tseba hobane O tla re bolella lintho tsena.”

A re, “Ke ’Na, ea buang le uena.”

¹⁵⁹ A siea nkho ea metsi, a kena motseng. O na a entse’ng? O ne a amohetse. O ne a E amohetse, ts’enolo ha E ne e tla ho eena. A matha a kena motseng a re, “Tloong, le bone Monna Ea mpoleletseng tseo ke li entseng. Na ha se Messia enoa?” O ne a E amohetse. Ke moo.

¹⁶⁰ Athé, Bafarasi le Basadusi ba ile ba reteleha, ba re, “Ke Belsebule. Ha re batle ho kena—kenana le Eena. Kahobane ts’e- . . .” Ba ne ba hahile motheo. Ba ne ba ena le tsela. Ba ne ba ena le tsela.

¹⁶¹ Bibele e itse, “Ho motho tsela e ka bonahala e lokile; pheletso ea eona ke lefu.” Ka baka leo, u se ke ua nka tsela e bonahalang e lokile.

¹⁶² Tloo ho Kreste, amohela Jesu e le 'Moloki oa hao, 'me u tlatsoe ka Moea o Halalelang. Joale, ha Moea o Halalelang o qala o tsamaea har'a lona, le tla elelloa.

¹⁶³ Ke 'ona mokhoa oa ho folisoa, ho tseba eo e leng Mofolisi. Jesu Kreste ke mofolisi. O na a tla etsa'ng ha A ka tla koano, bosiung bona, ho le folisa? O na a tla sebetsa kamoo A sebelitseng morao koana.

¹⁶⁴ Mosali o ne a fohle lets'olele a ama seaparo sa Hae. A hetla a re, "Ke mang ea Nkamileng?" Eaba motho e mong le e mong o a ema. A qamaka ho fihlела A mo fumane. 'Me A 'molela a ne a ena le phallo ea mali, 'me a re, "Tumelo ea hao e u pholositse."

¹⁶⁵ Eo e ne e le Jesu maobane. Ke Jesu kajeno, ha eba e le Eena maobane, kajeno, le ka ho sa feleng. U ke ke ua e lumela pele u amohela Kreste ka ho uena, joale A ntoo paka, ka bo-Eena, hore Ke Eena. Le bona seo ke se bolelang? [Phutheho e re, "Amen."—Mong.] Ke eona tsela ea ho fihla ho Eena, ke ho Mo amohela.

¹⁶⁶ Ke ao mabaka a supileng a re tlamang ho Mo amohela hona joale. Re ke ke ra ea nq'a e 'ngoe. "Ke Uena feela." U ke ke ua ea kereke ua fumana Hoo. Ha ke tsebe phutheho ea borapeli eo u ka eang ho eona ua E fumana. Ha ke—ke na letho khahlano le phutheho ea bolumeli. Empa batho ba bangata ba nahana feela, kahobane e le litho tsa kereke, ke pheto seo ba lokelang ho se etsa. U tlamehile ho tla ho Jesu. Ke Eena Tsela, e seng kereke. Ke 'Nete, e seng kereke. Ke Leseli, e seng kereke. Ke Motheo, e seng motheo oa kereke. Ke thabo e sa Feleng, Bophelo bo sa Feleng, lona feela Leruo le sa Feleng, eona feela Phetolelo. Mokhoa o le mong oa ho tseba Molimo, Mokhoa o le mong oa ho bona Ts'enolo, Mokhoa o le mong oa ho folisoa, ke ho tla ho Eena. U ts'oanela ho tla ho Eena, 'me u elelloa u b'u lumele.

¹⁶⁷ Joale u re, "Be, Moena Branham, ha ke eso bone ho etsoa mesebetsi e joalo."

¹⁶⁸ Che, kea ts'epa u tla bona. Kea ts'epa u tla bona hoo. Kopano e mothating oa ho qala. Ke batla lona ba mona, ba batlang ho Mo fumana, ho Mo tseba, le rapelle ho Mo tseba. Ba ba kae ba batlang ho Mo tseba le tle le Mo elelloe ha Moea oa Hae o kena ka har'a kopano? Phahamisa letsoho la hao. E re, "Ke batla ho Mo tseba hoo ke tla Mo elelloa." Kea leboha.

¹⁶⁹ Le tla Mo elelloa joang? Kahobane A tla etsa eona mesebetsi A e entseng mohla A na a le lefats'eng mona? Joale, Mohalaleli Johanne 5:19, O ile a re'ng?

¹⁷⁰ O ile a feta lets'eng la Bethesda, le tletse mats'olele a batho, liritsa le ba holofetseng. Jesu o ile a feta likete tse peli tseo, kapa ho feta, batho, a ba feta. A bona monna a robetse

liphateng. Kahobane, A tsebile, le a bona; A ile a 'mona, pele. A qetile lilemo tsena tsohle mono. 'Me a re... E ne e se seritsa, o ne a khona ho tsamaea. A re, "Na u rata ho fola?"

¹⁷¹ A re, "Ha ho ea nkenyang metsing. E re ke sa ea, motho a nkete pele, a le lebelonyana, a kene pele." A re, "E re ke sa ea, motho a nkete pele a kene pele."

¹⁷² A re, "Nka liphate tsa hao u tsamaee u ee hae." Monna eo a nka liphate tsa hae a ikela.

¹⁷³ A tloha a ba siea mono. Joale, taba eo ha e a utloahala hamonate, ha ke re? Empa e ne e le Jesu. Ka pelong, "Hobane'ng?"

¹⁷⁴ Joale, ha le ka bala la tsoela pele, temaneng e 'ngoe, temana ea 19, le tla utloisia lebaka la Hae la ho etsa joalo. Mohla ba ne ba 'Motsa, A re, "Ka 'nete, nete, Ke re ho lona, Mora o sitoa ho etsa letho a 'Nots'i. Empa seo A se bonang se etsoa ke Ntate, Mora o se etsa joalo." Le a e bona? "Joale ka ha Ntate, a sebetsa, le 'Na ke sebetsa joalo." Ka mantsoe a mang, "Ntate o Mponts'a pono. Ke tla bona seo A Mpolellang ho se etsa, 'me Ke tla bua feela seo A mpolellang ho se bua. Ke etsa feela seo A Mpolellang ho se etsa."

¹⁷⁵ Be, ke Motheo oo. Ke 'Nete eo. Ke Tseo eo. Ke Leseli leo. Alleluia! Ke Jesu eo.

Ho re, "Ha ke eso 'Mone."

¹⁷⁶ Ha nke ke bue taba ena, ho koaleng. Liveke tse 'maloa tse fetileng, tlase koana Florida, pel'a Kou ea Mexico, kae-kae tlase mono, kapa tulong e 'ngoe tlase pel'a Keys. Ho ne ho ena le—le ngaka, kea kholoa e ne e le eona, ea ileng a ea ts'oasa lihlapi. 'Me a hira lesupatsela le holileng ho thoë ke lesupatsela la makhonthe, le tla khona ho mo kenya le ho mo nts'a metsing. Eaba motsofe enoa o kena mokorong, a tloha, a soka nakoana ka masokoana a hae, a ema ho se ho kae. Letsatsi le eso ho chabe.

¹⁷⁷ 'Me—"me thaka leo la qala la utloa meeaa e makatsang, joale ka ha e ee e fihle holim'a leoatle hoseng ho hong le ho hong, e foka. A re, "Be," a qala a nahana, "re sesisetsa har'a leoatle. Leqhubu le tsamaea le rona." A bona mokoro, ea ka ba ne ba hoholoa. A re, a nahana, "Ha ke batle ho bua le lesupatsela leo, empa ke ts'oanetse—ke ts'oanela ho bua ntho e 'ngoe." A hla a hakala. A re, "Hela, monghali, re sesisetsa leoatleng, ha ke re?"

"Oh," a re, "Ha ke hopole joalo." A khutsa, a thola.

¹⁷⁸ Ka mora' nakoana a bona mokoro, o ntse o tsamaea, ho le mohuli ho le lefifi. A re, "Re sesisetsa har'a leoatle. Etsa ho hong. Ke uena lesupatsela. Etsa ho hong. Potlaka. Re kena leoatleng. Re tla khutla le kae?"

¹⁷⁹ Motsofe oa lesupatsela, a lula mono, a phuthulohile haholo, a re, "Che, be butle hanyenyane, ho tla ela, 'me re tla tseba moo re leng teng."

¹⁸⁰ Ema ho se ho kae. Leseli la Molimo le ke le chabele ka har'a phaposi ena, bosiung bona. Joale le tla bona moo le leng teng. Le tla bona hore le nke tsela efe, ka morao ho moo.

Ha re rape leng.

¹⁸¹ Ntate ea Maholimong, ho boletsoe Mangolong, “Ke ’Na Tsela, ’Nete, le Leseli. Ha ho motho ea ka tlang ho Ntate, ha e se ka ’Na. Ke ’Na monyako oa linku.” “KE NTSE KE LE TENG, KE NTSE KE LE TENG, KE NTSE KE LE TENG,” ho ea joalo le joalo, qetellong Ua bua, ua re, “KE ’NA EA LENG TENG.” “KE NTSE KE LE TENG” eo ha se oa maobane kapa hosane. Ke oa kamehla, o a ts’oana, “KE NTSE KE LE TENG.” Mongoaha o mong le o mong, moloko o mong le o mong, ka Bosafeleng bohole, e sa ntse e le “KE NTSE KE LE TENG.” Joale, U sa ntse u le “KE NTSE KE LE TENG” e moholo eo, e seng, “Ke ne ke le teng” kapa “ke tla ba teng.” Leha ho le joalo, U no u le teng, ’me U tla ba teng. Empa, leha ho le joalo, U ea phelang kamehla, “KE NTSE KE LE TENG.”

¹⁸² Ha ho makatse moapostola a itse, “Re ka ea ho mang, Morena? Re ka ea ho mang? Re U bona u etsa lintho tsena. Rea tseba ha ho motho ea ka etsang lintho tsena, Molimo a se ho Eena.”

¹⁸³ Nikodema a paka eona ntho eo, “Rabbi, rea tseba hobane U Moruti ea tsoang ho Molimo. Rea tseba. Rona Bafarasi, rona litho tsa kereke, rea tseba. Re ke ke ra e amohela. Re tla lelekaoa kerekeng. Empa rea tseba hobane U Moruti ea tsoang ho Molimo, hoba ha ho motho ea ka etsang mesebetsi eo U e etsang, Molimo a se ho eena.”

¹⁸⁴ Ruri, Morena, le kajeno ho a ts’oana. U sa le Motheo oo; Tsela eo, ’Nete eo, Leseli leo. Motheo oo! U sa le thabo eo. U sa le phethoho eo. U sa le lintho tsohle. E sa le Uena maobane, kajeno, ka mehla; Eena ea tsebang morero oa pelo. Eena maobane, kajeno, le ka mehla; mofolisi eo, ’Moloki eo.

¹⁸⁵ Molimo, ho ka ba le baetsalibe mona. Matsoho a mashome a mabeli kapa a mashome a mararo a phahame, nakoana e fetileng, ha ke botsa ea batlang ho U bona. Ke a beella ka thoko, nakoana e seng kae, ho fihlela tlahiso ea ka ea ho qetela, “Emang ho fihlela Mora a chaba, le tla bona moo le leng teng. Le se ke la hakala. Le se ke la mathela ka ntle ho kereke. Le se ke la etsa, la re, ‘Ho a chesa ho lula mona nakoa e telele.’ Empa ha re tholeng nakoana. Mora a ke a boneise. Leseli le ke le nyolohe. Jesu a fihle temeng A sebetse ’me a etse kamoo kileng a etsa mohla A na a le lefats’eng, re tla bona hore re ee kae.” Fana ka sena, Ntate. Re kopa sena ka Lebitso la Jesu le bakeng sa tlotliso ea Hae. Amen.

Kea tseba ho a chesa. Ha re na nako e kaalo.

¹⁸⁶ Ke ba bakae ba lumelang lipolelo tseo e le 'nete? [Phutheho e re, "Amen."—Mong.] Ha ho moo re ka eang teng. Tsela e 'ngoe ha e eo.

"Be, motho a ka kholiseha joang?"

¹⁸⁷ Ke ile ka ahlola kereke, joale ka mokhatlo. Ka ahlola motheo oo e hahiloeng holim'a 'ona, holim'a thuto ea babishopo le ba joalo, "Ba na le sets'oants'o sa borapeli, ba mpa ba latola Matla a jona." Hobane, ha ba lumele pholiso ea Khalalelo. Ha ba lumele kolobetso ea Moea o Halalelang. Ha ba lumele Lithuto tsa Evangeli e tletseng. Phutheho ea bona ea bolumeli, Mapentekosta, ba khelohela hole-hole. Ke 'nete. Nazarene, Pilgrim Holiness, ba hohotsoe, kahobane ba qala ba amohela thuto ea motho, borapeli ba lehlaku la feiga. Motho, ea itsamaelang, "Re ka ea kae?" Ana u tla etsisa ba mashome a supileng, ba tlohang ba ikela?

¹⁸⁸ Kapa, u tla etsisa Petrose, bosius bona? U re, "Morena, re tla ea ho mang? Ke mang eo re ka eang ho eená? Re bone hobane U na le Mantsoe a Leseli le sa Feleng. Ke Uena feela Ea nang le Oona."

¹⁸⁹ 'Me Jesu ke Eena feela ea ts'oereng moea oa hao letsohong la Hae. Kereke ea hao e ke ke ea u thusa. Kreste ke eená ea u thusang.

¹⁹⁰ U no u ka fumana kae...kapa ua lumela kapa ua bona kae Motheo o ka sibollang letho ka morao ho lefu? Kereke e ka u etsetsa'ng ka morao ho lefu? Kereke e ka u etsetsa'ng mohla lingaka li u ngalileng? Motho a ka u etsetsa'ng mohla mahlale a meriana a u tetseng, u jeloe ke mofets'e? Ha ho letho.

¹⁹¹ Empa Motheo o teng. O Mong o teng. Tsela e teng. Leseli le teng. Molimo o teng. Mofolisi o teng. 'Moloki o teng. Ea bokoang O teng, 'me O har'a rona bosius bona, kahobane A ts'episitse A tla ho etsa.

¹⁹² 'Me U itse, "Moo ba babeli kapa ba le bararo ba kopaneng ka Lebitso la Ka, Ke tla ba har'a bona. Mesebetsi eo Ke e etsang le bona ba tla e etsa. Ho se ho se ho kae, 'me lefats'e," eo ke kereke, ba ka ntle, "ha ba sa tla Mpona. Empa, lona le tla Mpona, hoba 'Na..." 'Me motho mang le mang ea keneng sekolo sa melao ea puo oa tseba hore "Nna" ke leemeli-bitso la motho. Le a bona? "Ke tla ba le lona, le ka ho lona, ho isa pheletsong ea lefats'e. 'Mesebetsi eo Ke e etsang le tla e etsa le lona." O ile a etsa mesebetsi efe? Joale ka ha Ntate a 'Monts'itse.

¹⁹³ Ke ka baka leo tlhahiso ea ka ea ho qetela e itseng, "Emang." Ha kea le rerela lefeela. Ha Jesu a sa etse seo ke se bolelang, seo Bibele e 'Moletseng a se entse, seo ke se qotsitseng, lona...Lengolo leo A le phethileng, ke tla be ke le

boleletse phoso; Bibele e tla be e le phoso; re ka tsoa ra ea batla borapeli ba Mohamede, a re batleng Buddha, borapeli bo le bong bo nepileng.

¹⁹⁴ Ha nke ke u bolelle hona joale, moena, pele u qala, Tsela e 'ngoe feela, 'Nete e 'ngoe feela. Ho na le borapeli bo le bong, bo ka pakang hore Mothei oa bona o tsohile bafung 'me o phela kamehla, amen, ke Kereke ea Molimo o phelang. E etsoa ke Methodists, Baptists, Presbeterian, le tse ling hape, Nazarene, Pilgrim Holiness, Pentecostals. Motha mang le mang ea tsoaletsoeng 'Musong oa Molimo, ea amohetseng Jesu Kreste, o hahiloe holim'a Motheo oo 'me a ke ke a feta le ka mohla o le mong, ho phomotsa ts'epo eo e sa Feleng. Leha ba ka koahela lekese la hao ka mobu, veke ho tloha hona joale, e ke ke ea u hlophla le hanyenyane. U mpa u tsoa mohahong 'ona oa khale, ho kena ho o mocha, ke pheto. E tla boela e u tsosa tsatsing la ho qetela.

¹⁹⁵ Jesu Kreste ke sona feela sebaka seo ho ka uoang ho sona. Ke ea ho Eena, ka pelo eohle ea ka, ka matla a ka 'ohle. Joale ka ha ne nka etsa hola ke ena le likete tse makholo a mahlano, joale ka ha re entse Bombay. Mona ka har'a kerekana, bosiung bona, ea batho ba lekholo le mashome a mahlano, kapa ntho e kang eo, mohlomong ha se bongata bo bo kaalo. Ka mokhoa o ts'oanang, ho phomola ho Eena, hore O tla Its'enola ka mokhoa o itseng, bosiung bona, le tle le utloisise hobane O teng mona.

¹⁹⁶ Likarete tsa ho rapelloa? Na le li nts'itse? [Motho o re, "E."—Mong.] Ho lokile. Le itse le tla nts'a tse kae? ["Tse ka bang mashome a mabeli."] Moena Ruddell, ke ne ke lebeletse uena, bosiung bona, ehlile. Empa ho no ho chesa haholo, 'me batho ba ne ba tla hatellana ba petetsane, 'me ba tlale ka mona, le joalo—joalo. Empa ho—ho joalo, kea kholoa, ba...Joalo ka ha ke entse, pele. Ke ne ke batlile ho lata mosali oa ka, eaba kea feta, ho bona bongata ba batho ba neng le teng mona, 'me ka fumana ho tletse, ke sa tsoa kena hape feela. Le a bona? Ka tla, ka jeka, ka ntoo khutla.

¹⁹⁷ Joale, ho a chesa. Empa, oh...[Sekheo lebanteng—Mong.] Ba 'maloa, 'me mohlomong re tla ts'oarana le ba 'maloa hape, ho feta, 'me re ba rapelle.

¹⁹⁸ Joale, ha ke re Morena o tla re etsetsa ntho e ikhethileng. Mohlomong O tla etsa hoo. Mohlomong A ke ke. Ha ke tsebe.

¹⁹⁹ Joale, ke eng, na le qalile ho 'ngoe? [Motho o re, "'Ngoe."—Mong.] 'Ngoe. Ho lokile. Ke mang ea ts'oereng karete ea ho rapelloa ea palo ea 'ngoe? Na u ka phahamisa letsoho la hao. Motha ea ts'oereng karete ea ho rapelloa ea palo ea 'ngoe. [Motho o bua ho hong.] U title? Palo ea 'ngoe? ["Tsoela pele. O eme ka morao."] Oh, ke masoabi. Ho lokile, mofumahali, u ka tla koano.

²⁰⁰ Palo ea peli, ke mang ea ts'oereng palo ea peli? Karete ea ho rapelloa ea palo ea peli, na u ka phahamisa letsoho la hao. Ngoananyana... Oh, ke—ke masoabi. Karete ea ho rapelloa ea palo ea peli, na u ka phahamisa letsoho la hao. Ho lokile.

²⁰¹ Le re karete ea ho rapelloa ea palo ea peli ha e eo ka mona? [Motho o re, "Ke ena mona."—Mong.] Mofumahali. Ho lokile. Tloo koano, mofumahali. Hantle koano mona.

²⁰² Palo ea tharo. Shebang ka potlako, joale, e ka ba motho ea sa utloeng, kapa motho ea sa khoneng ho ema. [Motho o re, "Ke ena moo e teng."—Mong.] Palo ea tharo, phahamisa letsoho la hao, hle. Karete ea ho rapelloa ea palo ea tharo. Ho lokile, monghali. Ke tseba monna enoa. Ho lokile.

²⁰³ Palo ea 'ne, phahamisa letsoho la hao. Karete ea ho rapelloa ea palo ea 'ne. Motho ea ts'oereng palo ea 'ne, hle. Mofumahali enoa mona. Kea kholoa ke tseba mofumahali enoa. Ha ke fose. Ke kholoa jaalo. Palo ea 'ne.

Palo ea hlano. Ka morao-rao. Ho lokile.

Palo ea ts'elela. Karete ea thapelo ea palo ea ts'elela. Ho lokile.

Palo ea supa. Karete ea thapelo ea supa, monna eo o a tla.

Palo ea robeli.

²⁰⁴ Billy, na u ka ea ba lokisa, u tl'u fumane sebaka sa ho ema, kapa ntho e 'ngoe.

Palo ea robong. Ke mang ea tso'ereng karete ea thapelo ea palo ea robong?

²⁰⁵ Mofumahali enoa mona? Ho lokile. [Khaitseli o re, "Palo ea robeli."—Mong.] Palo ea robeli. Ho lokile.

²⁰⁶ Palo ea robong, ke mang ea ts'oereng karete ea thapelo ea palo ea robong? Shebang hohle. E ka ba motho ea sa utloeng. Palo ea robong. Palo ea robong. Na ba ile ka ntle? Shebang hohle... Ha re re, motho mang le mang ea ts'oereng karete ea thapelo letsohong la hae, qamaka. E ka ba motho ea sa khoneng ho ema. Karete ea thapelo ea palo ea robong. Ha re batle ho tlola motho.

²⁰⁷ Na mofumahali enoa *mona* o ts'oere palo ea robong? [Motho o re, "Che, monghali. Leshome le metso e mene."—Mong.] Shebang.

²⁰⁸ [Motho o re, "Mashome a mabeli le metso e ts'eletseng. Mashome a mabeli le metso e ts'eletseng."—Mong.] Che. Che. Ke—ke holimo koana.

²⁰⁹ Palo ea robong. U se ke ua tla feela, palo ea hao e sa bitsoa, hle. Palo ea robong.

²¹⁰ Ke tseba mofumahali enoa. Mof. Ford, u ts'oere karete ea thapelo ea palo ea robong? Motho e mong a shebe. Mohlomong

ha a utloe. Gene, na u ka theohela koano, motsotso, 'me u e shebe? Moena Fred, tloo koano u thuses Billy, motsotso. Ho lokile.

²¹¹ Palo ea leshome, ke mang ea ts'oereng palo ea leshome?
Palo ea robong, palo ea leshome?

²¹² Batho ba kae na? Ho lokile. Re tla qala ka bana, he, ho ts'oarana le hona. Ho lokile.

²¹³ Joale, ke tsejoa ke batho ba bakae mono moleng oa thapelo? Uena o a ntseba, le eena u a ntseba. Ho lokile.

²¹⁴ Ke batho ba ba kae har'a lets'oele ba sa ntsebeng? 'Me ke sa...U tseba ke sa tsebe bothata ba hao, 'me u kula?
Phahamisa letsoho la hao. Ho lokile.

²¹⁵ Joale, lona ba sa ntsebeng, 'me le 'na ke sa le tsebe, ke batla ho etsa hona. Ke batla le lelale le shebe nq'a ena, le etsise mosali eo, re sa ts'oarane le molanyana ona oa thapelo.

²¹⁶ Joale, shebang. Batho bao ba kula. Ha ke bone batho ba liritsa, empa—empa batho bana ba kula. Joale, ha eba ba hloka pholiso, che, Motha o mong feela ea ka ba folisang, ke Jesu Kreste, Monna a le mong. Joale, A ka e etsa joang? O e etsa joang? Kahobane le lumela hobane O e entse, le lumela hobane O e entse. Joale, ha eba A phela, e tla ba E sa le mofolisi. Na ke 'nete? Phahamisang matsoho a lona. Ha eba A sa ntse a phela, E sa ntse e le mofolisi. Ho lokile. Joale he, ha A ka le pakela hore O sa ntse a phela, mona bosius bona, ha A ka Ipakela.

²¹⁷ Joale, A ke ke a ba mona ka sebopaho sa 'mele, hobane 'mele oa Hae o lutse letsohong le letona la Molimo. Ke ba bakae ba tsebang hoo? Le ho tseba hobane Moea o Halalelang, o no o le ka ho Eena, o khutletse koano mona joale o etsa eona mesebetsi eo O kileng oa E etsa ha o ne o le ka ho Eena, seo A se buileng. Ho lokile. Joale, ha A ka etsa eona mesebetsi eo A e entseng, ka ho rona.

²¹⁸ Joale, lona ba se nang likarete tseo tsa thapelo, 'me le sa ntsebe, 'me le ile la phahamisa letsoho la lona, le shebe ka nqa ena, 'me le re, "Morena, kea lumela U teng ka mona, 'me ke batla ho ama seaparo sa Hao. Hobo Bibele e U boletse joalo, hona joale, Moprista e Moholo ea ka angoang ke maikutlo a ka. Kea kula, 'me ke hloka thapelo. Ke batla ho thetsa seaparo sa Hao. Joale, U ke u bue ka Moena Branham u mpolelle seo ke tlamehileng ho se etsa." Etsa hoo feela—hoo feela, u fumane ha eba A le teng mona, kapa che.

²¹⁹ Oa pele moleng ke mang? Ho lokile. Ke mo...Enoa, mofumahali ea lutseng setulong mona? Ho lokile. Ho lokile.

²²⁰ Ntho ea pele, ke—ke lumela hoba ha ke—ke u tsebe, ha ke hopole. Ha re tsebane. [Khaitseli o re, "E, ho joalo."—Mong.] Ha re tsebane. Ho lokile. Joale, mosali eo ke sa mo tsebeng ke

enoa. [“Kea U leboha, Jesu.”] Ha ke tsebe letho ka eena. Ha ke eso ’mone bophelong ba ka. [“Hantle. Kea U leboha, Jesu.”] Ha ke mo tsebe.

²²¹ ’Me re eme mona re le papiso, joalo ka ha ho etsahetse Bibeleng. Ke mona ho kopana monna le mosali, joale ka ho Mohalaleli Johanne 4, ha le batla ho le bala. Jesu o n’ a kopane le mosali selibeng. [Khaitseli o re, “Kea U leboha, Jesu.”—Mong.] ’Me O ne a eso ’mone, le ’ena a eso ’Mone, pele.

²²² Ka baka leo A re, “Mosali, Mphe metsi.” O ne a etsa’ng? A hokahana le moea oa hae.

²²³ Eaba o re, “Ha se ts’oanelo ea ba-Jude ho kopa Basamaria lintho tse joalo. Ha re kopane.”

A re, “E-ea lata monna oa hao, le tle koano.”

A re, “Ha ke na monna.”

²²⁴ Ho re, “Ke ’nete. U bile le ba bahlano. Le eo u lulang le eena ha se oa hao.”

²²⁵ A re, “Monghali, kea lemoha hobane U moporofeta. Joale, rea tseba, rona Basamaria, rea tseba Messia mohla a tlang, O tla re bolella lintho tsena. Empa Uena U mang?”

A re, “Ke ’Na, ea buang le uena.”

²²⁶ Eaba o a matha, a bolella motse ’ohle. “Tloong, le tlo bona Monna ea mpoleletseng tsohle tseo ke li entseng,” kapa ntho e ’ngoe mabapi le eena. “Ana Enoa ha se eena Messiah?”

[Khaitseli o re, “Kea U leboha, Jesu.”—Mong.]

²²⁷ Che, efela ha e ne e le ponts’o ea Messia mohlang oo, ’me e sa le Eena maobane, kajeno, le ka ho sa feleng, ana kajeno ho ke ke ha ts’oana le mohlang oo? [Phutheho e re, “Amen.”—Mong.] Ana U n’ a sa tl’o e etsa ka ho ts’oana? [“Amen.”]

²²⁸ Ba bakae ba lona ka har’ a mohaho ’ona, u le moetsalibe, kapa u se eena, ea ka lumelang hore A khona ho e etsa ka ho ts’oana? Ha re boneng letsoho la hao.

²²⁹ Joale letsoho la ka ke lena. Kamoo ke tsebang, ha ke eso bone mosali bophelong ba ka bohle. [Khaitseli o re, “Kea U leboha, Jesu.”—Mong.] O eme mona, o re, “Kea U leboha, Jesu.” E ka ba Mokreste. Mohlomong ha se eena.

²³⁰ Batho ba bangata ba reng, “Kea U leboha, Jesu,” ba ntse ba sa tsebe letho ka Eena. Bongata ba bona. Le a bona? O itse, “Ba bangata ba tla re ho ’Na, ka Letsatsi leo, ba re, ‘Morena, Morena.’ Ha Kea ka ka le tseba,” A rialo.

²³¹ Joale, ha Jesu e sa le eena maobane, kajeno, le ka ho sa feleng, ’me A le har’ a rona mona, ha nka ikokobeletsa Eena, ho ineeela Eena, joale O tla sebetsa ka ’na joalo ka ha A entse ho Eena . . . Molimo o tla sebetsa ka ’na sekä A sebelitse ka Jesu,

ka mosali selibeng? Na ke 'nete? [Phutheho e re, "Amen."—Mong.] Joale, ke rona bana, bobeli ha re eso bonane. Na hoo ho tla etsa le lumele? ["Amen."] Na ho tla matlafatsa tumelo ea lona? ["Amen."] Joale ha eba A le teng mona, ha eba A phela, E sa ntse e le 'Moloki oa lona, e sa le mofolisi oa lona. Ke 'nete? ["Amen."] Joale bonang hore O tla e etsa.

²³² Joale, Molimo, taba ena e matsohong a Hao joale. Tsohle li ho Uena, kahobane re tseba hoba motho a ke ke a etsa lintho tsena. E tlamehile ho tsoa ho Uena. Ka kopo, Ntate, bosiung bona, molemong oa batho ba lutseng mona, tlotlisong ea Evangelii, ho ke ho etsoe, bosiung bona, Ntate, batho ba tle ba tsebe hobane U sa le Jesu Kreste, Eena maobane, kajeno, le ka ho sa feleng.

²³³ 'Me ha—ha lefifi le ka ts'oana le lutse lipelong tsa bona joale, ba sa tsebe, ba belalela, ba ipotsa, ha U ka tla ua bonesa Leseli, ba ke ba bone Tsela eo, joale, 'me ba kene ka ho Uena. Ba kula, ba ke ba fole. Ha ba lahlehile, ba ke ba bolokehe. Re tla bona tsela e khutlelang lebopong, ha Mora a hlaha. Fana ka sena, Morena. Ha "Letsatsi la ho loka le chabe ka pholiso lipheong tsa Hae," 'me Boleng ba Hae bo boholo bo khurumetse sebaka sena. Fana ka sena, Ntate. Re se kopela tlotliso ea Molimo, ka Lebitso la Jesu Kreste. Amen.

²³⁴ Ke batla hlompho ea lona, hoba re elelloa re ke ke... Hona hase ho bapala kereke. Hona ke ho mema Boteng ba Molimo o Matlaohle ka har'a mohahonyana ona.

²³⁵ Joale na le bona moo ke emeng? Ho na le batho ba lekholo le mashome a mahlano mona. Ke buile sena pel'a likete tse mashome, le likete tse lekholo, le ba likete tse makholo a mahlano, ka nako, ba lutse le bahetene, bomosalumele, ba hanang borapeli, bats'oari ba linoha, le ntho e 'ngoe le e 'ngoe. A ke ke a hloleha.

²³⁶ Joale, O tlamehile ho Ipaka E le Molimo oa Bibele, kapa Ha se Molimo oa Bibele. 'Me ha E le Molimo oa Bibele, e sa le Eena maobane, kajeno, le ka ho sa feleng, ha A ka bolella mosali enoa lebaka la ho ema mona. Ha ke eso 'mone. Kapa, ho 'molella seo a tsebang hobane ha ke tsebe letho ka sona. Ha A ka 'molella lebaka la hae la ho ema mona, joalo ka ha A kile a etsa ho mosali ea selibeng, ha A ka mo hhalosetsa ntho a e tsebang. Leha koana ke sa mo tsebe, le eena a sa ka a ntseba, joale ke rona bana re eme khetlo la ho qala bophelong, ruri seo se tla u khohlopa haholo, hoo moholi 'ohle o tla u apohela. A ke a fane ka sena, ke thapelo ea ka.

²³⁷ Joale, mosali ea tl'o rapelloa mona, ke batla ho lumele e mong le e mong joale. Joale, ha ke tsebe mofumahali eo, nka rata ho bua le eena motsotso feela, joalo ka ha Morena oa rona a entse ho—ho mosali ea—ea selibeng, e le ho kopana le moea oa hae.

²³⁸ Joale, mohlomong re . . . Ha re eso kopane, empa leha ho le joalo Morena o a u tseba, U bile o a ntseba. Ha A ka mpolella seo u se tlotseng mona, ho nkopa sona, ntho eo—eo u e tsebang. Homme ha ke tsebe letho ka uena.

²³⁹ Joale, ha eba A u rometse koano, le 'na ke tlisitsoe mona, mohlomong hore ke khone ho u hlalosetsa, kapa A ka bua ka 'na ho mpolella lebaka la ho nyolohela ha hao kalaneng ena, ana hoo ho tla u thusa ho lumela ho Eena? [Khaitseli o re, "E, ho tla thusa."—Mong.] Ho tla u thusa ho e lumela? Joale, ke a bona.

²⁴⁰ Le phutheho e ipoletse e tla lumela. Joale, ke rona bana, re itokiselitse hore ho etsahale ho hong, ha Molimo e sa ntse e le Molimo. Eona ntho Jesu Kreste a e entseng!

²⁴¹ Ke khona ho bona mosali joale. O batla ha nka rapella mahlo a hae. O na le phoso ka mahlo a hae. [Khaitseli o re, "Ke a U leboha, Jesu. Kea U leboha, Jesu."—Mong.] Joale, eo e ne e se kakanyo. Ke 'neta. ["Ke a U leboha, Jesu. Ke a U leboha, Jesu."] O lahleheloa ke pono ea hae, 'me o batla ho rapelloa, mahlo a hae. Ke 'neta. Hoo ke . . . Ha eba e le 'neta, ba tsokele sakatuku eo, khaitseli. ["Ho rorisoe Lebitso la Hao, Morena."]

²⁴² Joale, ha ke eso 'mone pele, bophelong ba ka. Hoo ho entsoe ke eng? Ho entsoe ke eng? [Khaitseli o re, "Ke a U leboha, Morena. Ke a U leboha, Jesu."—Mong.] O shebahala e le motho ea lokileng. Le hopola ke nohile taba eo? Ho lokile, re tla bona. ["Morena, re rorisa Lebitso la Hao, bosiung bona, Jesu."] Joale, mofumahali . . .

²⁴³ Hore pelaelo eohle e tle e tlosoe kerekeng ena, ho tloha kajeno, e tle e re ha Moena Ruddell a rera hoo, "Jesu Kreste e sa le eena maobane, kajeno, le ka ho sa feleng," sefala sena, se tle se tsebe, ha Kreste Jesu a bonahalitse khanya ea Hae a ba a e paka e le joalo. [Khaitseli eo o re, "E, Morena. Kea U leboha, Jesu."—Mong.]

²⁴⁴ Joale, e, kea 'mona . . . Mahlo a hae a ntse a senyeha. Mahlo a hae a na le stigmatism. [Khaitseli eo o re, "Kea leboha Uena, Jesu."—Mong.] Hape, ntho e 'ngoe, ho na le bothata ka eena. ["Kea U leboha, Jesu."] O na le . . . O entsoe oporeishene ea mofuta. ["Kea U leboha, Oho Morena Jesu. Oh!"] Hoo ha hlahisa motopa o moholo oa mosifa. Ha a tsoe motseng ona. ["Kea U leboha, Morena."] Ha a tsoe naheng ena. ["Oh!"] O tsoa Kentucky. Ke 'neta. 'Me o na le morali eo a batlang a rapelloe. ["Kea U leboha, Jesu. Alleluia! Alleluia!"] Ngoananyana, ea ka bang lilemo tse robeli kapa tse leshome. ["Oh!"] O batla ho rapelloe morali eo kahobane morali eo o tlil'o etsoa oporeishene. ["Kea U leboha, Molimo. Kea U leboha, Jesu."] Ke HO RIALO MORENA.

²⁴⁵ Le shebe hore ke 'nete kapa che. E ne e le 'nete, mofumahali? Ha e le 'nete, tsokotsa sakatuku seo hape, ho batho. [Khaitseli o re, "Kea U leboha, Jesu. O na le lilemo tse ts'eletseng feela."—Mong.] Ke ngoananyana. Ke hantle.

²⁴⁶ U lumela Molimo a ka mpolella lebitso la hao? [Khaitseli o re, "E, Morena. E, Molimo."—Mong.] Ha eba Molimo . . . Mona, ke tla u bonts'a ntho e 'ngoe. Ho fihla monna mona, oeme pel'a hao, ke monna oa hao. ["Ke a U leboha, Jesu. Kea U leboha, Jesu."] O lutse hantle morao mona. Ke 'nete. ["Kea U leboha, Jesu. Kea U leboha, Jesu."] Le eena o batla ho fola. O ts'oeroe ke ramatiki. Ke 'nete. ["Kea U leboha, Jesu."] Lebitso la hao ke Camper. ["Kea U leboha, Jesu."] Ke 'nete. 'Me u tsoa Kentucky. Khutlela tlase Kentucky, 'me u amohele . . . Nka sakatuku eo u e bee holim'a ngoana. [Khaitseli o a lla, "Oh!"] Lumela ka pelo eohle ea hao, u se ke ua etsoa oporeishene. Amen. U lumela ka pelo eohle ea hao? ["Oh!"]

²⁴⁷ E batla e ba pale ea bophelo ba mosali eo. Ke ts'oarahanya matsoho a ka, ha ke eso 'mone pele, bophelong ba ka. Hantle.

²⁴⁸ Joale, le a bona, o amme eng? O entse'ng? O amme Moprista e Moholo eo. O amme Eo ea ka angoang ke maikutlo a mahlomola a rona. Amen.

²⁴⁹ Joale, pholiso ke paki ea Molimo ka bo-eena, Khanya ea Hae ka Sebele. Ho lokile.

²⁵⁰ Uena, ke lumela u le molata ho 'na. Ha ke kholoe ke u tseba. Molimo o a u tseba. Ha Molimo a ka nts'enolela bothata ba hao, kapa see u se batlang; e ka ba boloretse, taba ea lelapa, kapa e ka ba eng; u tla lumela ka pelo eohle ea hao, u tla etsa joalo, mofumahali? [Khaitseli eo o re, "Oh, ee."—Mong.] Joale, mofumahali e mong eo ke sa mo tsebeng ke enoa, 'me le eena ha a ntsebe. Ha re tsebane ho hang. Ke kopano ea rona ea ho qala, bophelong. Empa, ha Moea o Halalelang o ka fihla, Boleng ba fihla mona ho re bolella ntho e 'ngoe ka mosali enoa!

²⁵¹ Joale, ho mo folisa, nke ke ka khona ho etsa hoo. Molimo o e phethile mohla A na a shoa Kalvari. Ha e le moetsalibe, nke ke ka mo pholosa. Hobane, Jesu o e phethile koana . . . Hoo ho se ho phethiloe. Empa A ka fihla ka Boteng ba Boleng ba Hae, ho Iponts'a A sa ntse a phela, le hore mesebetsi ea Hae e sa ntse e tiile, ho re netefaletsa eona, ha re ka e lumela.

²⁵² [Moena e mong o lla haholo 'me phutheho le eona e nyakalla haholo—Mong.]

²⁵³ "Ha u lumela, tsohle li ka etsoa." Ha u ka lumela feela joale. E ba le tumelo ho Molimo. U se ke ua belaela.

Joale, motho e mong o hlile o thabile. Feel a, hoo ho itoketse.

²⁵⁴ Ke ne ke haola naheng ea Kentucky, ka tsatsi le leng, ha ke utloa monna a tsamaea har'a lihlahlha, a nts'a hoeletsa. Ka re, "Ebe monna eo . . . Bothata ba monna eo ke bofe?"

Ha thoe, "O mpa a tauoe 'me o hlile o thabile."

²⁵⁵ Ho joalo le ka monna enoa, empa a tahiloe ke seno se fapaneng. O mpa a tahiloe 'me a hlile a thabile. Ke hantle. "Ka hona le se ke la taho ke lino tse bohale, le mpe le tahoe ke Moea," Bibele e boletse joalo.

²⁵⁶ Joale, mosali enoa, e leng molata, ha Molimo a ka 'molella bothata ba hae, kapa ntho e 'ngoe ka eena, eo a tsebang ke sa e tsebe, eena ke paki, o tla tseba ha e le 'nete, kapa che. Ke 'nete, mofumahali? Na hoo ho tla u thusa ha Molimo a ka etsa hoo? Joale, ho u folisa, khaitseli, hola nka khona ho etsa hoo, ke tla ho etsa, empa nke ke ka khona. Ke mpa ke le motho feela.

²⁵⁷ Empa mofumahali o tlie koano ho rapelloa. O na le bothata ba majoana a nyooko. Ke 'nete. 'Me o bile o ts'oeroe ke lefu la tsoekere. Ke seo u batlang ho rapelisoa ka sona, mofumahali, ha ke re? Ha e le 'nete, phahamisa letsoho la hao, batho ba tle ba bone. U lumela Molimo a ka mpolella hore u mang? Ana ho tla u thusa? Ho tla etsa joalo? Joale he, Mof. Johnson, u ka khutlela setulong sa hao, 'me ua fola, ha u fela u e lumela, ka Lebitso la Morena Jesu.

²⁵⁸ Ha u sa lumele, ha ke tsebe bothata. Ho na le ho phoso. Ha u bone na? Leseli la Mora le chabile. Ke eona ntho e Jesu a ileng a e etsa.

²⁵⁹ Ke tseba monna enoa. Ke ne ke... Mahoehali o teng mona. 'Me—'me ke bile ke tseba mosali oa hae. Ke mo qetetse khale, nako e fetileng. Lebitso la hae ke James Morris. Empa ha ke tsebe lebaka la hae la ho tla koano. Ha ke tsebe se phoso ka eena. Ke qetetse Jim khale. Empa ke... O ntsebile ke sa le moshanyana. Empa, Jim, ha Morena a ka nts'enolela lebaka la ho tla ha hao koano, u tla e amohela, u tla amohela seo u se kopang ho latela kamoo u lumelang? [Moena o re, "Amen."—Mong.] U mona ka baka la mora. ["Amen."] Ka bothata ba kelello. ["Amen."] U a lumela o tla fola? ["Amen."] E-ea, u e lumele, ke hona. ["Amen."] Lumela feela, ka pelo eohle ea hao. (Kea kholoa ke tla ts'oanela ho feta le moo, Moena Jim.)

²⁶⁰ Ke tseba mofumahali enoa. Ke mosali oa motsoalle oa ka e moholo. Lebitso la hae ke Himmelheber. Ke ile ka u bona ka lebenkeleng, mona, nakoana e fetileng. Ha ke na mohopolo oa bothata ba hao. Kea u tseba. Ke tseba monna oa hao. 'Na le monna oa hao re hotse 'moho, joalo ka bashanyana. 'Me o ile a ithutela, kea kholoa, ngaka ea manonyeletso a masapo, ho ba ngaka ea manonyeletso a masapo. Ke hantle. 'Me ke... ho tseba feela bothata ba hao. Empa ha Morena a ka nts'enolela...

²⁶¹ Joale, Mof. Himmelheber, molemong oa—oa—oa—oa Gilbert, le molemong oa khaitseli ea hae eo ke ne ke tloaetse ho tsamaea le eona, ha eba e le—e le molemong oa bona, hola nka

u folisa, ke ne ke tla etsa joalo, empa nke ke ka khona. Empa Eena O tla khona, ha u ka lumela joale. 'Me ha A ka u tsebisa hore—hore... Ehile, ke tseba lebitso la hao. Ke bile ke u tsebile nako e telele, empa ha ke tsebe bothata ba hao. Ha Molimo a ka mpolella phoso ea hao, u tla lumela ho Eena, bakeng sa pholiso ea hao? [Khaitseli eo o re, "Ke etsa joalo."—Mong.] Athritisi ke bothata ba hao. ["E."] Ke u bona u sataletse, u leka ho theoha moalang, hoseng. Ke hantle haholo. Ho lokile. Khutlela hae u amohelo pholiso ea hao, Mof. Himmelheber. Morena Molimo o a u folisa. Lumela ka pelo eohle ea hao.

²⁶² Morena a le hlohonolofatse. Le lumela ka pelo ea lona eohle? [Phutheho e re, "Amen."—Mong.] E bang le tumelo ho Molimo. Ho lokile.

²⁶³ Mofumahali ke enoa. Sheba mona, khaitseli. Che, ha ke tsebe mosali eo. Ke khlooa re sa tsebane. Empa Molimo oa re tseba, ha ho joalo na? Re siana haholo, ka lilemo, empa lena ke lekhetlo la rona la pele re kopana, kamoo ke tsebang kateng, kapa kamoo u tsebang. Ke khetlo la rona la pele. Le ka 'mona ha a sisinya hloho ea hae. Ke 'nete. Lena ke khetlo la pele ke bona mosali eo, bophelong ba ka. Empa—empa Molimo o re tseba bobeli ba rona. U re tseba re sa le bana. O na a re tseba. O re tsebile le pele ho theoa lefats'e. O tsebile re tla be re eme mona, bosius bona.

²⁶⁴ O tsebile ketsahalo ena e tla hlaha, le pele ho eba le—e ba le atomo kapa molekule. O—O e tsebile, Eena, kahobane A ne a le teng. O hloka pheletso. O tsebile ntho e 'ngoe le e 'ngoe pele lefats'e le boptjoa. A tseba ntho e 'ngoe le e 'ngoe e kileng ea etsahala. O tsebile ts'its'ili e 'ngoe le e 'ngoe, nako le nako ha e tabanya mahlo a eona. O tseba ntho e 'ngoe le e 'ngoe, kahobane A hloka pheletso. Le a bona? 'Me le ke ke la beela ntho e hlokang pheletso moeli. O mpa feela... Ke phethetho ea phethetho feela, e neng e ahile ho Eena. O se a fihlide. Ke phetho. Le a bona?

²⁶⁵ Joale, ha A ka mpolella seo bothata ba hao bo leng sona, joale na u tla lumela ka pelo eohle ea hao? [Khaitseli o re, "Morena!"—Mong.] U tla etsa joalo, ka pelo eohle ea hao? ["E."] Ho lokile.

²⁶⁶ U na le bothata ba pelo boo u batlang bo rapelhoe. Pelo. Ke 'nete.

²⁶⁷ Joale, ntho e 'ngoe e lutse pelong ea hao, le hona. U a bona, ke e fumane. U a bona? O ile ua nahana, "Ana o tla furalla pele a bua ntho ena?" Che. Ke tla u bolella. U mona ka baka la moshanyana, mora oa hao. Ke 'nete. 'Me mora eo ha eo mona. [Khaitseli o re, "Che."—Mong.] Mora eo o Ohio. ["E."] O kokelong ea T.B. ["E."] Ka T.B. ["E."] 'Me ha a bolokeha. 'Me u nts'u rapella moea oa hae, le ho hlaphoheloa ha hae. HO RIALO MORENA.

²⁶⁸ Ke le phepetsa ho leka taba eo, ho sheba ha e lokile, kapa che. Ke 'nene. Ha ke re, mofumahali? [Khaitseli o re, "E, monghali. Amen."—Mong.] Ke 'nene. ["E."] Ho lokile. Ha ke khone ho folisa. Ana u tla lumela? ["E, monghali."] Tloha u amohela he. Kamoo u e lumetseng kateng, ke seo u tla se fumana hantle. Tsamaea, ka Lebitso la Morena. Amen.

²⁶⁹ Le lumela ka pelo tsa lona tsohle? [Phutheho e re, "Amen."—Mong.] Le a bona? O, eona... Che, Leseli le chabile. Re tseba moo re emeng teng joale. Re ka pel'a Sefahleho sa Morena Jesu.

U ka re, "U ntse a bala likelello tsa lona."

²⁷⁰ Ho lokile. Nke ke ka sheba mofumahali enoa. Bea letsoho la hao holim'a la ka, mofumahali. Ha Morena a ka mpolella ka tsela ena, ke shebile ka nga *ena*, se phoso ka uena, ana u tla lumela? [Khaitseli eo o re, "E."—Mong.] Le ho lumela hoba u tla fola? ["E."] E mokokotlong oa hao. Ke hantle. Ha e le 'nene, tlosa letsoho la hao ho la ka. ["Amen."] E-ea, u folisoe. Jesu Kreste o a u folisa. U a bona? Ho lokile.

²⁷¹ Eena—Eena ke Morena Jesu feela, eena maobane, kajeno, le ka ho sa feleng. Ho lokile.

²⁷² Monna enoa ea tlang, u batla ho folisoa athritisi? U a lumela Molimo o tla u folisa? [Moena o re, "E."—Mong.] Khutlela morao u fole. Ho bonolo hakaalo feela. U e lumele feela. Khutlela setulong sa hao u re, "Ke lumela ka pelo eohle ea ka, ka khopolo ea ka eohle." U tla phekoloa. Lumela feela ka pelo eohle ea hao. U se ke ua belaela. Ho lokile, monghali.

²⁷³ Mosali enoa mona, ehlile, lea 'mona o a thothomela. O ts'oeroe ke letoope. Mohlomong ho sa na le ntho e phoso. Ha re boneng. E, monghali. O na le lefu la tsoekere. U a lumela Molimo o tla u folisa lefu leo la tsoekere, 'me?

²⁷⁴ Morena Molimo, re khalema ntho e mpe ena, ka Lebitso la Jesu Kreste. A ke a fole. Amen.

Khutlela setulong sa hao u fole, khaitseli.

²⁷⁵ Le lumela ka pelo tsa lona tsohle? [Phutheho e re, "Amen."—Mong.]

²⁷⁶ Ho ka thoeng ka lona, ba lutseng mono? Le a lumela? Lea lumela hobane ke moporofeta oa Molimo? [Phutheho e nyakkalla haholo e re, "Amen."—Mong.] Ho na le...Ha le ka lumela.

²⁷⁷ Lona ba se nang setlankana sa thapelo, lona ba—ba kulang ba hlokang, e bang le tumelo ho Molimo. Le ka e lumela. Ho lokile.

²⁷⁸ U tlisitse moshanyana eane ho folisoa. E mokokotlong oa hae. Ke hantle. O holofetse. U a lumela u ka khutlela le eena Arkansas, 'me a phekoloa, le hoba o tla itokela? U batla ho

tlohela lisakrete tseo, 'me u re, "Ke tla li tela," 'me u... le-le ho sebeletsa Morena le ho etsa ho lokileng? U tla etsa joalo? Ho lokile. Ho lokile. Joale e-ea, u bee letsoho la hao holim'a ngoana joale, u sa eme mono. Morena Molimo oa Leholimo a ke a folise ngoana eo. Le ho le...

Ke le phepetsa ho lumela.

²⁷⁹ Ho na le mosali ea lutseng mona, a lihile mahlo a hae, o shebile, o nchebile. Leoto la hao le na le bothata. Ke 'neta. U lumela Molimo a ka mpolella hore u mang? Ana u tla lumela ho 'na? Mof. Worley. Ho lokile, monghali, ke hantle haholo. Ha ke eso u bone bophelong ba ka. Ke monna oa hao eo ea lutseng ka mora' hao moo. Ke moreri. Ha ke eso 'mone bophelong ba ka, empa ke 'neta.

²⁸⁰ Ua lumela Molimo a ka mpolella se phoso ka uena, monghali? Ho na le sebaka sefahlehong sa hao, ha u tsebe hore ke mofets'e na, ha u tsebe seo e leng sona. Hape, u na le mothapo o khaohileng. Ke 'neta. U batla ho fola. Ke 'neta, Mongh. Worley. Ho lokile. U lumela ka pelo eohle ea hao? [Moena eo o re, "E."—Mong.] Joale u ka ikela ua amohela pholiso ea hao, ka Lebitso la Morena Jesu. Ke eona. Ke hantle.

²⁸¹ Ka mahlo a hao teng? Ua lumela Molimo o tla u phekola, morao mono, uena ea lutseng a nchebile? Ho lokile. Ha u lumela ka pelo eohle ea hao. Eba le tumelo ho Molimo, ke phetho seo u tlamehileng ho se etsa.

²⁸² Oh, banna! E etsahala hohle, joale, ha le ka e lumela feela. E eketseha haholo ka mona joale, motho e mong le e mong o leka ho lumela. Joale na lea lumela hobane Ke Mora oa Molimo? Lea lumela hobane e sa le Eena maobane, kajeno, le ka ho sa feleng?

²⁸³ Joale, ana ho na le motho ea sa Mo tsebeng joale ka 'Moloki oa hae mona, 'me u batla ho bolokeka? Na u ka rata ho etsa joalo? Ha u eso amohele Moea o Halalelang, 'me u batla ho tla kena ka Kreste, u tl'u be molumeli? Phahamisa letsoho la hao, ha u fela u re, "Nka rata ho..." Molimo a u hlohonolofatse. Nyolohela aletareng mona, hona joale.

²⁸⁴ Re fe lehlasonryana pianong mono, motsotso feela, pele re getella.

²⁸⁵ Ke u memela, ho tla koano, aletareng mona. Tloo mona hantle 'me u khumame. Ke moo, mohlankanyana. Ema hantle. Tloo koano, ngoananyana. Uena ea... Shebang moshanyana enoa. U tlamehile ho le hlabisa lihlong lona ba bang. U batla ho fetela teng, ka pele? U batla ho atamela ho Eena? Tloo hantle joale. Nyoloha u tle koano. Amen. Tloo joale hantle ka pel'a Sefahleho sa Moea o Halalelang. Ke hantle, moena. Tloo, joale. Ana u ka tla mona ua khumama,

pele ts'ebeletso ea pholiso e tsoela pele. Nyolohela koano hantle joale u folisoe moeeng, u ntoo sheba se etsahalang. Kena ka ho Kreste.

²⁸⁶ Ke Eena Tsela, 'Nete, Leseli. Ha ho motho ea ka tlang, ha e se ka Eena. Nka re, Methodist, Baptist, Presbeterian, Lutheran, u ka ba mang, ea eso ho amohele Moea o Halalelang, joale ke nako ea ho etsa hoo. Nyoloha u tle joale, 'me u kene ka ho Kreste. E tla u makatsa. U ke ke ua tseba mokhoa oa ho E ts'oara. U ke ke ua O utloisia, ha u sa amohele Moea o Halalelang. Tloo joale.

²⁸⁷ Ha ke buile 'Nete, Molimo o buile le 'na. Molimo o buile ka 'na. Ke boletse 'Nete. Ke Eena feela Tsela. Ke Oona feela Motheo. Ke Eena feela poloko. "Ha ho lebitso leo re le neiloeng tlasa Leholido bakeng sa poloko, ka ntle ho Lebitso la Jesu Kreste." Na u ke ke ua tla, ua Mo amohela hona joale?

²⁸⁸ Ho na le mengala e mekae morao mono, na le rata ho nyolohela koano, le khumame joale? Lona ba oeleng le ileng hole le Molimo, na le ka tla hona joale? Tloong le nyolohe. Ena ke hora.

²⁸⁹ Joale shebang. Ha u hana ntho ena, ha ke tsebe ha eba, mang le mang oa lona, u sa na le ts'epo e setseng, kapa che. Joale, ha ke bue kahobane ke eme mona. Empa kea le bolella, metsoalle, Molimo a ka hlola a etsa'ng? Ena ke nako. Ena ke eona hora eo Molimo a buang le batho ka eona.

²⁹⁰ Ho lokile, khaitseli. Ho lokile, bokhaitseli. Tloong hantle. Ena ke hora ea hao. Ena ke nako ea hao. Ha u sa tla hlola u eba haufi le Eena ho feta, ho fihlela u shoa u ema ka pel'a Sefahleho sa Hae. O teng mona hantle, O ipaka a phela. Na u ke ke ua tla?

Konyana' Molimo, ke tla fela! Ke tla fela!

Leha ke se na tokelo,
Mali a Hao, a ts'olotsoe,
Ha ke sa tla, kea lumela,
Konyana' Molimo, ke tla fela! Ke tla fela!

Ke tla, ke sa emele letho
Ho hlatsoa moea' ka...

²⁹¹ Ba na le sekoli se le seng, ke ho se lumele. Tloo. Ke eona ena. [Phutheho e rapela haholo—Mong.]

Mali a Hao, a hlatsoisia,
Konyana' Molimo, ke tla fela! Ke...

²⁹² U ka mo latola joang, ka mora' hoba A tle ka Mantsoe, a tle ka Botho, ho u tsebisa hore O teng mona, a bua le uena, a bileng a bua le uena hona joale? Lentsoe le le sesane leo le bua le uena. Ke Molimo. O batla ha u ka tla. Ha re sa saletsoe ke nako e ngata mona, metsoalle. Rea tsamaea mona. Ana u ke ke

ua tla khumama 'moho le sehlopha sena sa batho? Ho re, "Molimo, u nkauhele. Ke batla ho amohela Kreste joale. Ke batla ho tsoaloa labobeli. Ke batla ho tlatsoa ke Moea o Halalelang. Ke batla ntho ea makhonthe. Ke batla ho ba oa makhonthe."

²⁹³ Tloo joale, hantle hona joale, ho pota aletare, re sa bina temana e latelang ena. Na u ka tla joale ha re sa tla? [Phutheho e tsoela pele ho rapela ka matla—Mong.]

²⁹⁴ Joale, bang ba lona batho ba lokileng ba Bakreste nyolohelang koano, le lona. Bang ba lona batho ba kulang tloong, le khumame, le lona. Bang ba lona batho bao le leng Bakreste, nyolohang le khumame le bana, re sa rapela.

...amohela,
Kamohelo, ts'oarelo libeng, tokollo;
Hobane . . .

Tloo le bona, uena moetsalibe. Tloo le bona, uena.

. . . tla ho Uena,
Konyana' Molimo, ke tla fela!

Theohela mona hantle . . . ? . . .

Ke tla, ke sa lete letho
Ho hlatsoa moea' ka sebeng,
Uena, Mali'a Hao a hlatsoisisa,
O Konyana' Molimo . . .

²⁹⁵ U tla lahleheloa ke lehlohonolo ha u sa tle. [Phutheho e tsoela pele ho rapela ka matla—Mong.]

U tla nkamohela, leha ke le feela,
Kamohelo, ts'oarelo, hlatsuo, tokollo;
Uena Malia Hao a hlatsoisisa,
O Konyana' Molimo, ke tla fela! Ke tla fela!

²⁹⁶ Ho lokile. Kereke eohle e ke e inamise lihloho tsa lona. E mong le e mong, a rapele, u rapelle batho bao ba aletareng, e mong le e mong.

²⁹⁷ Motho e mong le e mong mona aletareng, joale, u tlie tlas'a motheo oa Mali a ts'olohileng. U tlie koano ho amohela Moea o Halalelang. U tletse ho ts'oareloa libe tsa hao; Molimo, Ea lokileng ea ratang.

²⁹⁸ Metsi a tla be a letile. Le ka kena lets'eng, hosasa, ho kolobetsoa, tlase kerekeng, ha molisa a batla ho u isa mono.

²⁹⁹ "Bakang, e mong le e mong oa lona, le kolobeletsoe ka Lebitso la Jesu Kreste ts'oarelong ea libe, 'me le tla amohela neo ea Moea o Halalelang."

³⁰⁰ "Eitse Petrose a sa bolela Mantsoe ana, Moea o Halalelang oa ts'olohela holim'a ba Le utloang, hoba ba bile ba ba utloa ba bua ka lipuo."

³⁰¹ Molimo oa Leholimo, Ea n'a tsamaea le baapostola, E leng Molimo kamehla le mehla, O teng mona bosius bona.

[Phutheho e tsoela pele ho rapela haholo—Mong.]

³⁰² Joale motho e mong le e mong a iname ka thapeло. Motho e mong le e mong a phahamise lentsoe la hae a rapele, molisa a sa re etella pele.

Moena Ruddell. Ho lokile.



RE KA EA HO MANG? SST60-0604

(To Whom Shall We Go?)

Molaetsa wona, ka Moena William Marrion Branham, o rerilwe sethatong ka Senyesemane ka Moqebelo mantsiboya, Phupjane 4, 1960, Tabernakeleng ea Gospel, mane Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2008 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org